

四庫全書

子部

欽定四庫全書

御定淵鑑類函卷七十五

設官部十五

諸曹郎官 尚書左右司郎中  
員外附 尚書都事 主事附

尚書令史  
行臺省

諸曹郎官一

原杜氏通典曰郎官謂之尚書郎漢置四人分掌尚書  
事一人主匈奴單于營部一人主羌夷一人主吏民戶  
口墾田一人主財帛獻貢委輸後漢尚書侍郎三十六

人後漢書曰尚書六曹侍郎三十六人一曹六人又漢官儀尚書侍郎三十五人又晉志曰光武分尚書為六曹之後今置三十人並未詳孰是主作文章起草取孝廉年未五十

先試牋奏選有吏能者為之更直五日於建禮門內尚書郎初從三署詣臺試初上臺稱守尚書郎中滿歲稱尚書郎三歲稱侍郎五歲遷大縣其遷為縣令縣令秩滿自占縣去詔書賜錢三萬與三臺祖餞餘官則否吏部典劇多超遷者鄭宏為僕射以臺職任尊而賞薄人無樂者諸吏郎補二千石自此始也八座受成事沒於

郎下筆為詔策出言為詔命

後漢尚書陳忠上疏曰尚書出納帝命為王喉舌之

官臣等既聞諸郎多文俗吏鮮有雅才每為詔文宣示內外轉相求請

其入直官供青縑

白綾被或以錦縠為之

**縹** 縹  
紫也列反

給帳帷茵褥通中枕

大官供食物湯官供餅餌及五穀果實之屬五日一美

食下天子一等給尚書郎侍史一人女侍史二人皆選

端正妖麗執香爐香囊燒薰護衣服奏事明光殿省省

中皆以胡粉塗壁畫古賢烈士以丹朱漆地故謂之丹

墀尚書郎口含雞舌香以其奏事荅對欲使氣息芬芳

也奏事則與黃門侍郎對揖黃門侍郎稱已聞乃出丞

郎月賜赤管大筆一雙隃麋墨一九

後漢王譚為尚書侍郎臺閣議奏常

依義據法為三臺之表

又三輔決錄曰陳重與其友

雷義俱拜尚書郎義以左黜重見義去官亦以病免

又徐防為尚書郎職典樞機周魏自黃初改祕書為中

密畏慎

隃麋今沂陽縣出墨

書置通事郎掌詔書

即今中書舍人之任

而尚書郎有二十三人

有殿中吏部駕部金部虞曹比部南主客司部度支庫部農部水部儀曹三公倉部民曹二千石中兵外兵都

兵別兵考功定課部非復漢時職任青龍三年尚書令陳矯奏置

都官騎兵凡二十五郎每一郎鼓白試諸孝廉能結文

案者五人謹封奏其姓名以補之晉尚書郎選極清美

號為大臣之副武帝時有三十四曹

加魏直事屯田起部左士右士其民

曹中兵外兵分為左右主客又分為左右南北無農部定課考功凡三十四曹

後又置運曹為

三十五曹置郎中二十三人更相統攝

賈充改定律令以裴楷為定律科

郎或為三十六曹

晉裴秀以尚書三十六曹統事準例不明宜使諸郎任職未及奏而薨

當五王之難其都官中騎三曹郎晝出督戰夜還理事

嵇含言於長沙王乂曰昔魏武每有軍事增置掾屬尚書令陳矯以有軍事亦奏增郎況今都官中騎三曹晝

出督戰夜還理事一人兩役內外廢乏含謂各有主帥委之大將軍不宜復令臺寮雜與其間乂從之乃增郎

史及令

東晉有十五曹

殿中祠部吏部儀曹三公比部金部度支都官左民騎部倉部庫部

外兵

自過江之後官資小減

王坦之字文度選曹將擬為尚書郎坦之聞之曰自

過江尚書郎正用第二人何得以此見擬又宋江智淵改尚書庫部郎時高流官序不為臺郎智淵門孤援

寡獨有此選意甚不悅固辭不拜梁王筠除尚書殿中郎王氏過江以來未有居郎署者或勸不就筠曰陸

平原東南之秀王文度獨步江東吾得比蹤昔人何所多恨乃欣然就職桓玄僭位改都官

為賊曹宋高祖時有十九曹元嘉以後有二十曹郎三

公比部主法制度支主竿都官主軍事刑獄其餘曹所

掌各如其名

宋武帝初加置騎兵主客起部水部四曹并東晉舊十五曹合為十九曹元嘉十八

年增刪定曹郎即魏世之定科郎也三十  
年又置功論郎後又省騎兵故為二十曹  
齊依元嘉制

其拜吏部郎亦有表讓之禮

齊謝朓遷尚書吏部郎上表三讓中書疑朓官未及

讓以問沈約約曰宋元嘉中范蔚宗讓吏部朱循之讓黃門蔡興宗讓中書並三表詔答其事宛然近代小官

不讓遂成常俗恐此有乖讓意王藍田劉安西並貴重初不自讓今豈可慕此不讓耶孫興公孔顗並讓記室

今豈可三署皆讓耶謝吏部今授超階讓別有意豈關官之大小梁加三曹為二十三

曹

加殿中虞曹屯田

其郎中舊用員外郎正主簿正佐有才地

者為之遷通直郎天監三年復置侍郎視通直郎郎中

遷為之

梁到洽為尚書殿中郎洽兄弟羣從遞居此職時人榮之又殿中郎闕武帝曰此曹舊用文



學且居雁行之首宜詳陳有二十一曹省梁二曹後魏  
擇其人乃以張緬為之

三十六曹

其史闕文

至西魏十二年改為十二部

後周既改為部遂以

柳慶為計部郎中又柳靖為尚書度支郎遷正員郎  
今人或謂前代正員郎即今尚書郎中按歷代所稱正

員郎者即散騎侍郎耳謂非員外通直者故謂之正員  
郎則非尚書之職自魏晉以後尚書省自有郎中官不

應更置北齊有二十八曹

吏部考功主爵殿中儀曹三  
公駕部祠部主客虞曹屯田

起部左中兵右中兵左外兵右外兵都兵都官二千  
石比部水部膳部度支倉部左民右民金部庫部其

吏部三公各二人餘並一人凡三十郎中

後魏北齊隋  
惟置郎中

初尚書有六曹二十四司凡領三十六侍郎

吏部司勳  
主客膳部

兵部職方都官司門度支部比部刑部等侍郎各二人主爵考功禮部祠部駕部庫部金部倉部工部屯田郎各一人

分司官曹務直禁省如漢之制至開皇三

年二十四司又各置員外郎一人以司其曹之籍帳侍

郎闕則攝其曹事

今尚書員外郎其置自此始以前歷代皆謂之尚書郎各以曹名為稱首

或謂之侍郎皆無員外之號前代史傳及職官要錄或有言員外郎者蓋謂員外散騎侍郎耳非尚書之職說在散騎篇前代所言郎官上應列宿蓋謂三署郎非謂今尚書郎中也具三署郎敘篇中煬帝即位

以尚書六曹各置侍郎一人以貳尚書之職

今之侍郎其置自此

始也或有曹加二人者夫侍郎之名舊矣漢凡諸郎皆掌更直執戟宿衛諸殿門以侍衛之故通謂之侍郎故

武帝時拜東方朔為郎當時謂之官不過侍郎位不過執戟是也歷代尚書亦有侍郎隋初尚書諸曹二十四司諸郎皆謂之侍郎通若今之郎官耳非今改諸司侍六部侍郎之任自漢以來尚書侍郎悉然

郎曰郎則今郎中之職又改吏部為選部郎禮部為儀曹郎兵

部為兵曹郎刑部為憲曹郎工部為起曹郎以異六侍

郎之名廢諸司員外郎而每司增置一曹郎各為二員

都司置左右司郎中各一人品同諸曹郎掌都省之職

尋又每減一郎置承務郎一人同開皇員外郎之職唐

改隋諸司郎為郎中每曹又復置員外郎武德六年廢

六司侍郎貞觀二年復舊今尚書省有左右司郎中各一人員外郎各一人分管尚書六曹事其諸曹諸司郎中總三十人員外郎總三十一人通謂之郎中尤重其

選

凡郎中章服並玄冕五旒衣無章裳制敝一章兩梁冠凡員外郎章服並爵弁玄纓簪導青衣纁裳一梁

冠其職任名數各列在六曹之後初學記曰案北史

侍郎隋煬帝置也郎中秦官也員外郎隋文帝置也初

西漢置尚書郎四人光武分尚書為六曹每一尚書則

領六郎凡三十六郎焉秦初置郎中令

領諸郎之在中書者而為之令

長也漢武改  
名光祿勳

其屬官有三署

五官中郎將左中郎將右中郎將凡三署也

署

中有郎中侍郎無員多至千人分隸三署主執戟侍宮

殿出則充車騎漢因之

郎中秩比三百石侍郎比四百石以其為郎居中故曰郎中以

其為郎內侍故曰侍郎

漢官云尚書郎初從三署郎選詣尚書臺

試每一郎缺則試五人先試牋奏郎中侍郎之名猶因

三署本號也

西漢言郎者多非尚書郎惟田蚡少為諸曹郎是也其文帝時馮唐為郎中署長直

不疑盜同舍郎金武帝時顏驄為郎三世不遷成帝時揚雄為侍郎及諸言以貲為郎父任為郎皆三署郎至東漢猶難分有尚書及曹名冠首者即尚書郎西漢以來郎直言為郎亦三署郎魏以後即無三署郎

尚書諸曹郎中侍郎或不兩置

或惟置郎中或惟置侍郎然此二者亦通為尚

書後漢兩置有郎中侍郎魏晉宋齊後魏北齊惟有郎

中梁陳兩置有郎中侍郎

五代史志云梁尚書郎初入臺稱郎中功高者轉為侍郎

陳氏依梁制案前代郎中侍郎兩置者侍郎即今郎中之任郎中即今員外郎之任若惟置郎中亦今郎中之

任隋文帝開皇初惟置侍郎

亦尚書郎也隋氏諱中不置郎中惟置侍郎為尚書

郎尋又每曹置一員外郎煬帝於六尚書曹置六侍郎

增品第四諸曹別置二郎尋又每曹省一郎而加承務

郎一人當開皇員外之職唐又改為郎中又依開皇每

曹置一員外郎

諸曹郎官二

原應宿

覩天

許華嶠後漢書曰館陶公主為子求郎不

列宿出居百里非其人則民受其殃王隱晉書曰樂  
廣為尚書郎與何晏鄧颺等談講衛瓘見而奇之曰常  
恐微言將絕今復聞之命諸子造馬謂曰此人之  
水鏡也每見此人瑩然猶披雲霧而覩青天也起

草

題柱

漢官儀曰尚書郎主作文書起草晝夜更直  
五日於建禮門內三輔決錄注曰田鳳字

季宗為尚書郎容儀端直入奏事靈帝  
目送之因題柱曰堂堂乎張京兆田郎

趨墀

伏省

應助漢官儀曰尚書郎舍雞舌香伏奏事黃門郎對揖  
跪受故稱尚書郎懷香握蘭趨走丹墀摯虞三輔決

錄曰馮豹字仲文為尚書郎每奏事未報常伏省闥下  
或自昏至明天子默使人持被覆豹敕令勿驚也日暮  
諸郎下豹每  
在後帝嘉之  
持被 護衣 上詳伏省注  
下詳通典  
覆錦 舍

香

蔡質漢官典職曰尚書郎給綾被或以錦被  
下詳趙攄注

無雙

第一

東觀漢記

曰黃香知古今記羣書無不涉獵兼明圖識天官星氣  
鍾律歷算窮極道術京師號曰天下無雙江夏黃童京  
師貴戚慕其聲名更饋衣物拜尚書郎司馬彪續漢  
書曰胡廣字伯始舉孝廉試為天下第一旬月拜尚書  
郎

三年 五日

上詳通典  
下詳起草注

哀烏位

明時郎

漢官

天文志曰南宮二十五星哀烏郎位故明  
帝曰郎官上應列宿即此也  
下詳通典

更直建禮

入奏明光

上詳起草注  
下詳通典

兼理兩曹

奏事三世

續漢



書曰胡伯始旬月拜尚書郎恪勤職事所掌辦護兼理  
兩曹轉左丞又曰徐昉為尚書郎性惟周密畏慎在

臺閣典職十年奏事三世未嘗有過

握蘭丹墀

珥筆華軒

上詳初學記潘岳

贈陸機詩云薜帶龍墀光贊納言優游省閣珥筆華軒

給青縑被

賜赤管筆

上詳通典漢官云尚書郎五時賜珥赤管大筆一雙分墨一丸

賈充定法令

劉

頌典科律

晉書賈充拜尚書郎典定科令兼度支考課辨章節度事皆施用劉頌拜尚書三公郎

典科律申冤訟累遷中書侍郎

龔遂清儉賜衣

馮豹俯伏覆被

漢書

云龔遂拜尚書郎桓帝嘉其才又見衣服不鮮左右稱其清儉賜衣及車馬等物下詳初學記

杜

元凱擢拜

王叔武超遷

王隱晉書云杜預字元凱以婚親之恩擢拜尚書郎

晉

書王彪之字叔武從伯導謂曰選官欲以汝為尚書郎  
汝幸可作諸王佐耶彪之曰位之多少既不足計自當

任之於時至於超遷  
**列宿山郎**  
上見華嶠後漢書  
漢楊惲為中郎

將故事令郎出錢市財用給文書廼得出名曰山郎移  
病盡一日輒償一沐或至歲餘不得沐其豪富日出遊

戲惲將罷山郎移長度大司農以給財用  
**粉署蘭**  
注山財用所出故名山郎長度總計也

**省**  
仙署 仙 省華省  
**握蘭起草**  
**襍被舍香**  
上魏 舒事  
**償**

**金避杖**  
上直不疑事 下藥松事  
**集雉哀烏**  
蕭芝為尚書郎 有雉數千恒集

芝舍當直送至洛陽及應休  
**比秩交禮**  
後漢和帝 初令郎官

詔除者得占丞郎以比秩為真也  
**分**  
晉職官志八 座初拜皆沿其舊制並集都座交禮遷又解交焉

欽定四庫全書  
御定詞鑑類函  
九

曹寓直父任

郎潛

張安世以父任為郎

諸曹郎官三

原遜孝悌為郎

漢舊儀云高后遜孝悌為郎宿吏二千石以上視事滿三年得任其同產子為

郎

簡良能親職

裴秀奏事云謹案臺閣簡統萬機動為法制是以特宜精簡良能以親其

職

三朝不遇

馮唐

十年無過

徐昉

邦之俊茂

晉起居注

云臺郎御史萬邦之俊茂若出掌牧守頌聲興矣

朝之俊選

裴秀奏事云臺郎皆朝之俊選

當區處事宜辨正疑滯

大臣之副

山濤啓事云舊選尚書郎清望號稱大臣之副州取尤者

以應州刺史久無郎副之人無先之者請以補職也

宰士之雋

又云荊州宜都有郎王恒之以

病出義陽鄧遜有才義論者以為宰士之偶而未滿之年臣以為宜先用之也

彌綸舊章

謝承

後漢書云承父嬰為尚書侍郎服事丹墀彌綸舊章策文通訓條在宮禁祕於省閣惟承臺郎升複道取得為

開覽其餘他官莫敢闕闕也

煩劇之任

郭璞辭尚書表云今當以劣弱之質充督責之官

無用之才管繁劇之任

主作文書

續漢書百官志云尚書侍郎三十六人一曹有六人作文

書起草起

受口宣詔

百官表注云直郎一人主受書及受口宣詔皆書二通校侍郎一通付主

者施行

趨翔廊閣

華陽國志云杜軫起家入為齊尚書郎每月趨翔廊閣之下威容可觀中書

之朝偉

優游省閣

詳前

馬游卿甲科為郎

漢書云馬宮字游卿治嚴

氏春秋以射策甲科為郎

阮德猷上第拜郎

阮德猷集云策在上第即拜尚書郎毀譽

之徒或言對者因緣從託詔乃更延羣才廷對

王公仲明經為郎

漢書云王嘉字公仲

平陵人以明經射策甲科為郎

陸士衡文學轉郎

王隱晉書陸機為郎中令吳王晏出

鎮淮南以機有文學通尚書中兵郎轉殿中郎

禰正平性與道合

後漢禰衡傳云東海

孔融上疏薦衡曰臣竊見處士平原禰衡淑質貞亮英才卓犖幼涉藝文升堂覩典目所一見輒誦於口耳所

營聞不忘於心性與道合思若有神

夏侯湛理識明徹

司馬攸與山巨源書云太子舍

人夏侯湛柔心居正理識明徹應可為郎也

黃香數陳得失

後漢書黃香為尚書郎數

陳得失賞賚增加嘗獨止宿臺上晝夜不離省闈帝聞善之

郭璞數言便宜

王隱晉書

郭璞還尚書郎數言便宜多所匡益

龔遂處當平浚口筆俱著

謝承後漢書云

龔遂字巨卿拜尚書郎性敏達彌縫舊章深識典故每奏事朝廷所問應時建白桓帝嘉其才臺閣有疑事一以委遂處當平波

口筆俱著轉左丞

劉裕國家故事浚於口筆

又云劉裕字伯

祖補尚書郎裕有才辨自在臺閣陳國家事故每有奏波於口筆為羣寮所服

獨直臺上

後漢

鍾離意傳云藥崧河內人天性樸忠家貧為郎嘗獨直臺上無被枕食糟糠帝每夜入臺輒見崧問其故甚嘉之自此詔大官賜尚書以下朝夕餐給帷被卑袍及侍史二人

有益臺閣

山濤啓事云太子舍

人夏侯湛有盛才而不長治民有益臺閣在東宮已久今殿中郎缺宜得才學不審其可參此選否也

奏議為臺閣崇信

華嶠後漢書陽球為尚書郎開達故事其所奏議常為臺閣所崇信

據法為三臺之表

謝承後漢書云王諱除尚書郎服事臺閣專習國典據法為三臺之表

三署服其慎

東觀漢記云樊梵字文高每當直事駐車待漏冠劍不解於身為郎二十歲未

嘗被奏三署服其慎也

談者詠其高

王隱晉書魏舒為尚書郎時欲沙汰郎官非其才者

罷之舒曰吾即其人也襍被選出同寮素無清論者咸有媿色談者莫不詠其高也

解系州里

榮馬

晉書云解系及二弟結育並清身潔已俱歷洗馬舍人尚書郎州里榮焉

王湛臺閣

益重

王湛別傳云湛為尚書郎事要機會輒中波之無所不辦臺閣益歸重也

煒煒羣龍

吐芳蘭

嵇含中臺宴會詩云殿中日煒煒羣龍吐芳蘭

謙謙君子美曾顏

嵇含

詩曰三公日謙君子美曾顏

不能為郎

三輔波錄云丁郎舉孝廉為郎故侍郎以令史久次

補之世祖始改用孝廉郎稱病不就詔問病差為郎否對曰臣不病恥以孝廉為令史職世祖怒杖之詔問欲

為郎否耶曰能殺臣者陛下不能為郎者臣詔遣出竟不拜郎

**固辭不拜**

晉書云王國寶少無

士操不修廉隅婦父謝安惡其傾側每抑而不用除尚書郎國寶以中興膏腴之族惟作吏部不為餘曹郎固

辭不

**藥崧走入牀下**

後漢書云明帝性褊察嘗以事怒郎藥崧以杖撞之崧走入牀

下帝怒甚疾言郎出郎出崧曰天子穆穆諸侯皇皇未聞人君自起撞郎帝赦之

**韓宣職事**

**受罰**

魏略曰韓宣為尚書郎曾以職事受罰文帝輦過之問是誰縛左右以實對帝念臨淄侯遂輕車解

縛

## 諸曹郎官四

原詩晉陸士衡贈尚書郎顧彥先詩曰朝遊遊曾城夕



息旋直廬迅雷中宵激驚電光夜舒玄雲拖朱閣振風  
薄綺疏豐注溢修雷潢潦侵階除停陰結不解通衢化  
為渠沈稼湮梁潁流民沂荆徐眷言懷桑梓無乃將為  
魚 唐蘇味道在廣州聞崔馬二御史並拜臺郎詩曰  
振鷺齊飛日遷鶯遠聽聞明光共待漏清覽各披雲喜  
得廊廟舉嗟為臺閣分故林懷柏悅新握阻蘭熏冠去  
神羊影車迎瑞雉羣遠從南斗外遙仰列星文 沈佺  
期酬蘇員外味道夏晚寓直省中詩並命登仙閣分宵

直禮闈大官供宿膳侍史護朝衣卷幔天河入披庭月

露微小池殘暑退高樹早涼歸冠劍無時釋軒車待漏

飛明朝題漢柱三署有光輝 增韓昌黎天星送楊凝

郎中賀正詩曰天星牢落難喔咿僕夫起餐車載脂正

當窮冬寒未已借問君子行安之會朝元正無不至受

命上宰須及期待從近臣有虛位公今此去歸何時

錢起送陸郎中詩曰事邊仍戀主舉酒復悲歌粉署含

香別轅門載筆過鶯聲出漢苑柳色過漳河相憶情難

盡離居春草多 又喜李侍御拜郎官入省詩曰粉署

花驄入丹霄紫誥垂直廬驚漏近賜被覺霜移漢主前

瑤席穰侯許鳳池應憐行後雁空羨上林枝 韋莊南

省伴直詩曰文昌二十四仙曹盡倚紅檐種露桃一洞

煙霞人迹少六行槐柳馬聲高星分夜彩寒侵帳蘭惹

春香綠映袍何事愛留詩客宿滿庭風雨竹蕭騷 白

樂天賀楊十二新拜省郎詩曰文昌新入有光輝紫界

宮牆白粉圍曉日雞人傳漏箭春風侍女護朝衣 岑

參省中即事詩曰華省謬為郎蹉跎鬢已蒼到來還襍  
被隨例且含香 王介甫送致政朱郎中東歸詩曰平  
生不省問田園白首忘懷道更尊已上印書辭北闕稍  
留冠蓋餞東門馮唐老有為郎戀疏廣終無任子恩今  
日榮歸人所羨兩兒腰綬擁高軒

尚書左右司郎中一

員外附

原杜氏通典曰隋煬帝三年於尚書都省初置左右司  
郎二人品同諸曹郎從五品掌都省之職唐貞觀二年

改為郎中龍朔二年改為左右丞務咸通元年復舊令  
掌副左右丞所管諸司事省署抄目勘稽失知省內宿  
直判都省事若右司不在則左并行之左司不在右亦  
如之 員外郎武后永昌九年置與郎中分掌曹務神  
龍元年省二年復置 增六典曰左右司郎中員外郎  
各掌付十有二司之事以舉正稽遲者置符目焉凡都  
省掌舉諸司之綱紀與其百寮之程式以正邦理以宣  
邦教 文獻通考曰宋制左司郎中右司郎中左司員

外郎右司員外郎各一人掌受付六曹之事而舉正文書之稽失分治省事左司治吏戶禮奏鈔班簿房右司

治兵刑工案鈔房而開拆制敕御史

元豐六年都司置御史房主行彈糾

御史案察失職

催驅封樁印房則通治之有稽滯則以期限舉

催初於都司置吏設案而議者謂臺郎宰掾不當自為官司遂隨省房分治所領之事惟置守分書奏各四人主行校定省吏都事以下功過及遷補之事元豐七年都司御史房置簿以書御史六曹官糾勘之多寡當否

為殿最歲終取旨陞黜紹聖元年詔諸司以歲終點檢  
六曹稽違最多者具郎官姓名上省取旨二年詔御史  
臺察六曹稽緩違失者送左司籍記宣和二年左司員  
外郎王蕃奏都司以彌綸省闋為職事無不預今宰丞  
入省諸房文字填委次第呈覆自朝至於日中或昏暮  
僅絕其勢不暇一一檢閱細故而省吏徑稟宰丞請筆  
以草檢令承從官齋赴郎官廳落日押字謂宜遵守元  
豐及崇寧舊法諸房各具簽貼先都事自點檢次郎官

押訖赴宰丞請筆行下於是詔曰先帝肇正三省詔給  
令都司以贊省務今都司寢以曠官緣省吏强悍敢肆  
侵侮自今違法事其左右司官具書其事舉劾情重者  
竄責元豐寄祿為朝議大夫 事文類聚曰宋朝以為  
階官元豐正名始實有職掌建炎三年以置檢正省左  
右司二員二年詔左司書擬吏戶禮機速房右司書擬  
兵刑工賞功房文字後以右司掌刑房事任為劇乃置  
二員 續文獻通考曰遼南面尚書省置左右司郎中



左右司員外郎 金尚書省左司郎中一員正五品員  
外郎一員正六品掌本司奏事總察吏戶禮三部受事  
付事兼帶修起居注官迴避其間記述之事每月朔朝  
則先集是月滿者為簿名曰闕本及行止簿貼黃簿并  
官制同進呈御覽畢則受而藏之每有除拜凡尚書省  
所不敢擬注者則一闕具二三人以聽制授都事二員  
正七品掌本司受事付事檢勾稽失省置文牘兼知省  
內宿直檢校架閣等事右司郎中一員正五品員外郎

一員正六品掌本司奏事總察兵刑工三部受事付事  
都事二員正七品所掌同左司 元尚書省與中書省  
更變不一其左右丞參議中書省事左右司郎中皆參  
贊中書省 明洪武元年設中書省左右丞各一人其  
屬左右司郎中各一人員外郎各一人都事各一人後  
革中書省置六部遂無左右司之名矣

尚書左右司郎中二

員外附

增隋書曰骨儀遷尚書右司郎於時政漸亂濁貨賂公

行凡當樞要之職無問貴賤並家累金寶天下士大夫  
莫不變節而儀勵志守常介然獨立 事文類聚曰隋  
煬帝始置左右司郎各一人宋因改曰郎中服章與諸  
司郎中並同玄冕五旒衣 章裳刺黻一章兩梁冠  
又曰天后始置左右司員外郎各一人時顧琮以侍御  
史陳元懷直以洛州司戶遷其朝服與諸司員外郎並  
爵弁玄纓簪導青衣纁裳一梁冠 又曰白敏中字用  
晦為左司員外郎武宗惟聞白居易名欲召用之是時

居易病足宰相李德裕薦敏中文辭類其兄而有器識

又曰武元衡字伯蒼遷左司郎中詳整任職時以詳  
整稱重 唐書曰許鑑為左司郎中不稱職張鷟劾之  
云位膺列宿爵綰通班總八座之繁司承萬機之要務  
鏘鏘會府掌北斗之璣衡肅肅禮闈握南管之樞輿

長編曰元豐六年七月左司郎中范雍直龍圖閣河北  
轉運使都司出使除職自此始元祐元年范子奇范純  
夫自左右司出為河北京東轉運皆用雍例直龍圖閣

楊誠齋集曰張栻字敬夫除右司員外郎知閣門事  
張說除簽書栻夜草手疏極言其不可且詣宰相質責  
之宰相慚憤不堪而上獨不以為忤親札疏尾付宰相  
使諭旨栻復奏上意感悟命得中寢

尚書左右司郎中三

員外附

增精簡得人 掄選有序

唐書曰太宗朝劉洎上疏曰尚書萬機乃為政本比者綱

維不舉並為勳戚在位品非其任功勢相傾將救茲弊且宜精簡四員左右丞左右司郎中如並得人自然綱維一舉亦當矯正趨競豈惟息其稽滯哉九國志曰吳王潛為左司郎中典選事時喪亂之後官失其守甲

簿湮沒潛雍容款接坐客常滿隨才而接人人自以為得徐知誥相吳掄遜有序潛之力也

公廳

沒事

都堂坐白

劉摯傳摯遷右司郎中初宰掾每於執政分廳時請問白事多持兩端伺

意旨摯始請以公禮聚見共決可否晦菴集曰張維留為左司郎中遇事有未便輒詣都堂坐白或曰瑣瑣辨切非朝官體公曰都司助調鼎實幾微所關若視吏簽擬輒涉筆書不置可否安用我輩耶

沮大

臣議

宣都司力

東都事略曰倪清遷左司員外郎方議有事燕雲大臣爭先沒策濤獨曰

天下久平士不習戰軍儲又絀無輕議以貽後患宰相王黼曰左司敢沮軍耶罷之楊誠齋集曰葉顥除右

司時孝宗初即位欲清中書之務增宰士之員公膺首選遷左司一日帝召諫官曰葉顥在都司三年甚宣力

然與宰相為朋黨諫官對曰臣不識顥聞之公論不然因陳其求外補意帝默然良久曰非卿則朕無以知此

欽定四庫全書

卷七十五

人越翼日除吏部侍郎兼權給事中

書數曾布

面折頤浩

丁未錄曰陳瓘為右

司員外郎以書獻曾布曰尊私史而壓宗廟緣邊費而壞先政皆閣下之過也布讀之大怒辨論移時瓘指事

敘言辭色不撓堂吏比肩疎觀又以日錄辨國用須知繳申三省遂出知秦州中興系年錄曰紹興三年時

方審量濫賞以左右司領之呂頤浩當國時有縱舍員外郎王岡獨持不可曰公秉國鈞於天下具瞻之地不

平謂何怨始有所歸矣頤浩翼然

自書除目

學為宰相

哲宗實錄曰王震字

子發元豐四年開天章閣初用官制大除拜詔震與吳雍從輔臣執筆入記聖語面授右司員外郎直使自書

除目時論榮之會要曰紹興十三年三省擬進右司郎中上謂輔臣曰神宗聖訓云左右司便是學為宰相

豈可不謹擇

尚書左右司郎中四員外附

增制唐元稹韋審規等左司戶部郎中等敕曰尚書郎  
會天下之政上可以封還制誥下可以昇負牧守居可  
以優游殿省出可以察視違尤非第一流不議茲選具  
官韋審規等皆歷踐臺閣閑達憲章或滿歲當遷或擇  
才斯授皆極一時之妙足為三署之光於戲提紀綱而  
分命六聰左右司之職甚重登生齒以比董九賦人曹  
郎之任非輕勉竭彌綸之心勿虛俊茂之舉 蘇頲授



柳渙左司員外郎敕曰具官柳渙襟情雅正藝能敏洽  
珥筆記言才光東觀張燈起草譽動南宮宜同滿歲之  
遷式副為郎之舉 又授姜昂右司員外郎等敕曰尚  
書金部員外郎姜昂殿中侍御史李常等勵節修身敏  
才通識金曹典事頗效精勤白簡繩違久聞堅正皆能  
奉職宜稱遷升昂可尚書右司員外郎常可行侍御史  
散官勲如故

尚書都事

主事附

原杜氏通典曰都事晉有尚書都令史八人秩二百石與左右丞總知都臺事宋齊八人梁五人謂之五都令史職與晉同舊用人常輕武帝詔曰尚書五都職參政要非但總領衆局亦乃方軌二丞頃雖求才未臻妙簡

可革用士流以盡時彥乃以都令史視奉朝請

其時以太學博士

劉訥兼殿中都司空法曹參軍劉顯兼吏部都太學博士孔虔孫為金部都司空法曹參軍蕭軌兼左民都宣毅墨曹參軍王顯兼中兵都隋開皇初改都令史為五人並以才地兼美歷茲選矣

都事置八人煬帝分隸六尚書置六人領六曹事唐因

之主事二漢有之

漢光祿勳有南北庭主事三署之事於諸郎之中察茂才高第者為

之後漢范滂字孟博自光祿四行遷光祿主事時陳蕃為光祿勳滂執公儀詣蕃蕃亦不止滂懷恨投版棄官

而去郭泰聞之曰若范孟博者豈宜以公禮格之蕃乃謝又胡伯蕃公沙穆並為之後魏於尚

書諸司置主事令史隋於諸省又各置主事令史員煬

帝三年並去令史之名但曰主事隨曹閒劇而每十令

史置一主事不滿十者亦一人雜用士人

顏慤楚者文學名流為內

史主唐並用流外增事文類聚曰本尚書都令史之

職蓋前漢官也漢尚書臺令史秩二百石魏令史皆八

品梁陳品第八隋正八品上唐置六人從七品上自晉  
宋齊後魏北齊隋置八者當八座之數梁陳置五者當  
五曹之數唐置六者當六曹之數宋尚書省都事正八  
品元於左右二司各置都事亦古制也 續文獻通考

曰金尚書省左司都事二員正七品掌本司受事付事  
檢勾稽失省署文牘兼知省內宿直檢校架閣等事右  
司都事二員正七品所掌同左司 明無尚書都事官

尚書令史一

原杜氏通典曰尚書令史漢官也後漢尚書令史十二人曹有三人主書後增劇曹三人合二十一人皆選於

蘭臺符節簡練有吏能者為之

漢官儀云能通蒼頡史籀篇補蘭臺令史滿歲

補尚書令史滿歲為尚書郎曰往時楚獄大起故署令史以助郎職而類多小人好

疏

名奸利今者務簡皆可停省

其尚書郎初與令史皆主文簿其職一

也郎闕以令史久次者補之光武始革用孝廉孝廉恥

焉

時故事尚書郎缺以令史久次補之光武始改用孝廉為郎又郎中袁著詣闕上書訟梁冀矯暴其陰

殺之學生劉常當代名儒素善於著冀召常補令史以此辱之

舊制尚書郎限滿補縣

長令史補丞尉尚書令鄭宏奏曰職尊掌簿多無樂者

請即補千石令史為長帝從之

蜀志董厥為府令史諸葛亮稱之曰董令史良

士也後遷至尚書令史平臺事

西晉令史朝晡詣都座朝江左惟早朝

而已又賈充為尚書令以目疾表置省事吏四人尚書

置省事自此始也其品職與諸曹令史同

姚萇圓符堅遣僕射尹緯

詣堅問事堅見其瓌傑問曰卿於朕代為何官緯答曰尚書令史堅曰卿宰相才王景略之儔也而朕失之今日之亡不亦宜乎晉宋蘭臺寺正書令史雖行文書皆有品秩

朱衣執版給書僮孔顗為御史中丞坐鞭令史為有司

所糾

孔顗性素儉蘭臺令史者三吳富人輕顗故也

梁陳與晉宋同後魏令史

亦朱衣執笏然謂之流外勲品北齊尚書郎判事正令

史側坐書令史過事令史皆平揖郎無拜自隋以來令

史之任文案煩屑漸為卑冗不參官品

開皇十五年詔州縣佐史三年

一代不煬帝以四省三臺皆曰令史九寺五監諸衛府得重位

則皆曰府史於時令史得官者甚少年限亦賒

隋牛宏嘗問於

駱尉劉炫曰案周禮士多而府史少今令史百倍於前制官減則不濟其故何也炫曰古人委任責成歲考其

殿最案不重求文不繁悉太史之任掌要目而已今之文簿恒慮覆理鍛鍊苦辛甚密萬里追證百年舊案故

諺曰老吏抱案死今古不同若此之相懸也宏又曰後魏北齊之時令吏從容而已今則不遑寧舍其事何也炫曰齊氏立州不過十三府行臺遞相統領文書行下不過十條今州二百其繁一也往者州惟置綱領郡置守丞縣惟令而已其所具察則長官自辟受詔赴任每州不過數十令則不然大小之官悉由吏部纖介之迹皆屬考功其繁二也省官不如省事省事不如清心官不省而欲從容其可得乎宏甚善其言而不能用唐

武德中天下初定京師穀糴貴遠人不相願仕流外始於諸州調佐史及朝集典充選不獲已而為之遂促年限優以敘次六七年有至本司主事及上縣尉者自此之後遂為官途總章中詔諸司令史考滿合選者限試



一經時人嗟異著於謠頌

時問立本為右相姜恪為左相立本無他才識特以善畫

稱之恪嘗累為將軍立功塞外是歲京師饑旱弘文崇賢司成三館學生並放歸本貫當時為之語曰左相宣

威沙漠右相馳譽丹青三館學生放散五臺令史明經

增文獻通考曰宋制判

省事一人以諸司三品以上充總轄二十四司及集議

定謚文武官封贈注甲發付選人出雪投供之事令史

三人驅使官三人散官一人續文獻通考曰金廢帝

正隆二年罷尚書省直省令史出為外官明無尚書

令史

# 尚書令史二

原掌錄上事

百官表注云諸曹郎令史與郎並處事宜別掌錄上事立草

掌發章

表

又云直事令史掌發納章表及上事上書條牒疏奏門下注發日月其啓皆直注也

別錄判

校

又云尚書令史偕左右丞共所司別掌錄判校朝令也

別掌立草

見前

義士

二人

魏志云濟陰王思與梁習俱為西曹令史思因直日白事失太祖旨太祖大怒教召主者將加重辟

時思近出習代往對已被收執矣思乃馳還自陳已罪罪應受死太祖歎習之不言思之識分曰何意吾軍中

有二義

國士之風

王隱晉書云趙孟字長舒入補尚書都官令史善於清談有國士之

風其面

邊讓占對閑敘

後漢書邊讓傳云大將軍何進間讓才名欲辟命之恐不

至詭以軍事徵召既到署令史進以禮見之  
讓善占對閑敏如流時賓客百數皆高慕之

黃浮奉

公憂民

汝南先賢傳云黃浮為城里所差次當洛亭於是感激學書心遂開朗乃隨人到京師入公府

求學事歲餘為公府令入補尚書令史  
奉公憂職以功除昌慮長號為神君

孫鑠遂起就

職

不為鑠緒晉書云孫鑠字巨業補吏部令史歎曰郡縣

口諸人並清列不陞卑雜而我獨  
屯塞不通如何遂就職遷尚書郎

高軫處法平允

魏氏

春秋云高軫為刺史處法平允夙夜匪懈至抱文  
書而寐太祖見而哀之徐解裘覆之而去自是辟焉

李苾用法平整

王隱晉書云李苾字升平為  
功曹除吏部令史用法平整

行臺省一

原杜氏通典曰行臺省魏晉有之昔魏末晉文帝討諸

葛誕散騎常侍裴秀尚書僕射陳泰黃門侍郎鍾會等

以行臺從至晉永嘉四年東海王越帥衆許昌以行臺

自隨是也

以越請討石勒表以行臺隨軍

及後魏謂之尚書大行臺別

置官屬

後魏道武帝置中山行臺以秦王儀為尚書令以鎮之孝文永熙三年以宇文泰為大行臺以

蘇綽為行臺度支尚書

北齊行臺兼統民事自辛術始焉

武帝八年辛術

為東南道行臺東徐州刺史郭志殺郡守文宣聞之敕  
術曰江南初附百姓難向京師留卿為行臺亦欲理邊  
民冤枉監理牧守自今以後所統十餘州地諸有犯法  
者刺史先啓聽報以下先理後表齊代行臺兼總民事

自術始也其官置令僕射其尚書丞郎皆隨時權制

江左無行臺惟

梁末以侯景為河南王大行臺承制如鄧禹故事

隋謂之行臺省有尚書令僕

射

左右任置

各一人主事四人有考功

兼吏部主爵司勳

禮部

兼祠部主

客膳部兵部

兼職方

駕部庫部刑部

兼都官司門

度支

兼倉部

金

部工部屯田

兼水部虞部

侍郎各一人每臺置食貨農圃武

器百工監副各置丞

食貨四人農圃一人武器二人百工四人

錄事等員

食貨

農圃百工等各二人武器一人

蓋隨其所管之道置於外州以行尚書

事

增文獻通考曰開皇八年將伐陳則置淮南行省

於壽春九年已平陳則廢淮南行臺省唐初亦置行臺  
武德四年詔陝東道大行臺尚書省自令僕至郎中主  
事品秩皆與京師同而員數差少山東行臺及總管諸  
州並隸焉其益州襄州山東淮南河北等道令僕以下  
各降京師一等員數又減焉行臺尚書令得承制補署  
其秦王齊王府官之外各置左右六護軍府及左右親  
事帳內府貞觀以後廢其後諸道各置採訪等使每使  
有判官二人兼判尚書六行事亦行臺之遺制 致堂

胡氏曰由朝廷制藩屏以藩屏臨州縣以州縣治百姓如挈裘而振其領政出於一則稟承者無二三之惑今唐全有四海置郵以傳命雖萬里之遠不逾時月而至矣而建一二行臺於外使大臣承制補置是政出於朝廷又出於行臺夫豈國無異政之體哉 按行臺省之名雖始於魏晉之間然西漢初興高祖所以委蕭何世祖所以命鄧禹其權任益亦類此唐天寶以後以盜賊陷兩京吐蕃侵畿甸則或以大元帥副元帥命親王勳

臣為之然但可任專征之責而他事則稟朝旨則亦未嘗倘行臺省之事也至其末年方鎮擅地請節於是或以侍中中書令同平章事王爵命之如錢鏐馬殷王審知之徒蓋名為奉正朔而實自為一朝廷矣然則行臺省之名苟非創造之初土宇未一以此任帷幄腹心之臣則必衰微之後法制已隳以此處分裂割據之輩至若承平之時則不宜有此名也建炎時張魏公以樞密使宣撫川陝趙忠簡謂之曰元樞新立大功出當川陝



半天下之責自兵事外悉當奏稟蓋大臣在外忌權太重也及魏公得罪謫詞言假便宜行事之制忘人臣無將之嫌肖內閣以招賢擬尚方而鑄印然則承制之事易以惹謫忠簡之言固篤論也 事文類聚曰宋無行臺省 續文獻通考曰行中書省即行尚書省遼不設金宣宗置行省於陝西元制行中書省凡十秩從一品掌國庶務統郡縣鎮邊鄙與都省為表裏中統至元間皆以省官出領其事其丞相皆以宰執行某處省事係

銜其後嫌於外重改為某處行中書省至元二十四年  
改行尚書省尋復如舊每省丞相一員平章二員左右  
丞二員參知政事二員郎中員外郎各二員都事二員  
明洪武丙辰改浙江等行中書省為承宣布政司及  
設都指揮使司提刑按察使司於各省遂定官制先是  
仍元為行中書省或分中書省六部尚書往往出為參  
知政事參政入為尚書至是始改為布政使司按察司  
都司是謂三司官並治省城

# 行臺省二

增理邊民冤

有王佐才

上見通典注北史蘇綽為周文帝行臺郎中在官歲餘

未見知臺中咸稱其能僕射周慧達稱其有王佐才時  
文帝與公卿往昆明池觀魚至漢故蒼池顧問左右莫  
有知者或曰蘇綽博物乃召問綽應對如流文帝嘉之  
乃令綽並馬至池及夜還留綽問以政道臥而聽之文  
帝乃起整衣冠危坐不覺膝之前席語遂達曙詰朝謂  
周慧達曰蘇綽真奇士也即拜大行臺左參政典機密  
自是寵遇日隆

辦槽解圍 備艇全橋

獨孤永業齊後主時為河陽道行臺僕射


洛州刺史周武帝親攻金墉永業出兵禦之曰是何達  
官作何行動周人曰至尊自來主人何不出看客永業  
曰客行息速是故不出乃連夜辦馬槽二千周人聞之  
以為大軍將至乃解圍去北齊張亮為行臺左丞高

仲密之叛也與斛律金守河陽周太祖於上流放火船  
燒河橋亮乃備小艇百餘艘皆載長鑠鑠頭施鉤火船  
將至即馳小艇以鉤鉤之分鑠向岸  
船不得及橋之獲全張亮之力也  
專制河南拜

鎮東都

侯景為南道大行臺位司徒言於神武曰恨不  
得兵三萬橫行天下要須濟江縛取蕭衍老翁

以作太平寺主神武壯其言使擁兵十萬專制河南仗  
任若已之半體屈突通判陝東道行臺左僕射時從  
討王世充世充平論功第一拜  
陝東道大行臺右僕射鎮東都



御定淵鑑類函卷七十五

# 欽定四庫全書

子部

欽定淵鑑類函卷七十六

詳校官宗人府府丞<sub>臣寶光</sub>兼

主事<sub>臣祁韻士</sub>覆勘

總校官檢討<sub>臣何思鈞</sub>

校對官中書<sub>臣金光悌</sub>

謄錄監生<sub>臣繆暉吉</sub>

欽定四庫全書

御定淵鑑類函卷七十六

設官部六十

吏部尚書

侍郎附

吏部尚書一

侍郎附

原杜氏通典曰周禮天官太宰掌建邦之六典以佐王

治邦國

變冢言太者進退異名也百官總焉則謂之冢  
率列職於王則謂之太宰宰主也建立也邦國

王所居之邦國佐猶助也周公居攝而作六典之職以  
佐王理邦國漢成帝初分尚書置四曹蓋因事設員以  
司其務非擬於古制也至光武乃分為六曹迄於魏晉  
或五或六亦隨宜施制無有常典自宋齊以來多定為

六曹稍似周禮至隋六部其制益明唐武后遂以吏部為天官戶部為地官禮部為春官兵部為夏官刑部為秋官工部為冬官以承周六曹官之制若參詳古今徵考職任則天官冢宰當為尚書令非吏部之任今吏部之始宜出於夏及夏官之屬有司士下大夫二人掌羣官之司士云

臣之版

古書版為班班書或為版版名籍也

歲登下其損益之數

謂用功過黜陟

者辨其年歲與其貴賤

年數多少知其老少

周知邦國都家縣鄙

之數卿大夫士庶子之數以詔王理

告王所以當進退

以德詔爵

有賢者之德乃詔以爵

以功詔祿

理有功勲後詔以祿

以能詔事以久奠食

能者事成乃食之王制曰論定然後官之任官然後爵之位定然後祿之奠音定

漢成帝初置



尚書有常侍曹主公卿事後漢改為吏曹主選舉祠祀

後又為選部

靈帝以梁鵠為選部尚書

魏改選部為吏部主選事

吳暨

豔字子休為選曹尚書性峭厲好清議當時郎署混濁多非其人欲區別賢愚彈射百寮覈選三署皆貶高就下減降等數其居位貪鄙志節卑污者皆以為軍吏置營府以處之故憤惋聲積競言豔用私情愛憎不由公

理豔自殺

坐晉與魏同

山濤為吏部尚書啓事曰臣欲以都說為溫令詔可尋又啓曰詢聞說喪

母不時葬遂於所居屋後假葬有異同之議請更選之詔曰君為管人倫之職此輩應為清議不與便當裁處

之江霸字思賢三為選官始為吏部郎遷侍中吏部尚書僕射劉聰僭號省吏部置左右選曹石勒時又

置左右執法郎典定仕族副選舉之任

宋時吏部尚書領吏部刪定三公

比部四曹孝武不欲威權在下大明二年分吏部尚書

置二人以輕其任而省五兵後還置一吏部尚書順帝

昇明元年又置五兵二尚書晉宋以來吏部尚書資位

尤重庾炳之為吏部尚書通貨賄吏部令史錢泰能琵琶主客令史周伯齊善歌詣炳之宅諮事因留宿

尚書舊制令史諮事不得停外雖梁陳亦然梁蕭子顯

有八座命亦不許為所司奏免官梁蕭子顯

書性凝簡負才氣見九流賓客不與交言但舉扇一揮

而已衣冠竊恨之又謝覽字景滌耻之弟淪之子自

祖至孫三世居選部時以為榮又王泰字仲通為都

官尚書能接人士皆願其居選官頃之為吏部尚書衣

冠傾屬又謝舉字言揚遷掌吏部舉祖莊後魏北齊

求代再典選至舉又三世此職前代未有

吏部統吏部

掌襲崇  
選補

考功主爵三曹

自洛陽遷鄴以後  
掌大選知名者數

四文襄帝少年高明所蔽者疎袁淑德沉密謹厚所傷者細楊愔風流辨給取士失於浮華惟辛術為尚書性

尚貞明擢士以才以器循名責實新舊參舉管庫必擢門閥不遺前後銓衡術最為折衷甚為當時所稱後

周有吏部中大夫一人

掌羣臣及諸子之簿辨其貴賤  
與其年歲歲登下其損益之數

依六勲之賞  
頒祿之差

小吏部下大夫一人

掌貳吏部之事領司勲上士

等官屬大司馬隋吏部統吏部主爵司勲考功四曹

牛宏

為吏部尚書其選舉先德行而後文才所進用多稱職吏部侍郎高孝基鑒賞機悟清慎絕倫然爽俊有餘迹似輕薄時宰多以此疑之惟宏深識其貞推心委任隋之選舉於斯為盛又曰盧凱攝吏部尚書何孚奏蘇

威陰事凱相連憲司奏凱曰房恭懿者尉遲迴之黨不當仕進威凱二人曲相薦達累轉為海州刺史又吏部參選者甚多凱不即授官皆作色而遣威有從父弟徹肅二人微詣吏部徹文狀後至而先任用肅左足攣蹇才用凡劣凱以威之故而授朝佐郎文帝怒曰凱敢將天官為私惠乃除名為庶民自後周以降選無清濁及盧凱攝吏部與薛道衡陸彥師等甄別士流故涉黨錮之譖遂及於此

唐龍朔二年改吏

部尚書為司列太常伯咸亨初復舊光宅元年改吏部為天官神龍元年復舊天寶十一年改為文部至德初復舊掌文官選舉總判吏部司封司勳考功四曹事舊令班在侍中中書令上開元令移在侍中中書令下尚

書六曹吏部兵部為前行戶刑為中行禮工為後行其  
官屬自後行遷入二部者以為美自魏晉以來凡吏部  
官屬悉高於諸曹其選舉皆尚書主之自隋置侍郎貳  
尚書之事則六品以下銓補多以歸之自唐貞觀以前

尚書掌五品選事

貞觀二十二年二月文部侍郎盧承  
慶兼檢校兵部侍郎仍知五品選事

承慶辭曰五品選事職在尚書臣今掌之便是越局太  
宗不許曰朕今信卿卿何不自信也由是言之即尚書  
兼知五品  
選事明矣至景龍中尚書掌七品以上選侍郎掌八品

以下選至景雲元年宋璟為尚書始通其選而分掌之

因為常例開元以前諸司之官兼知政事者午前議政  
於朝堂午後理務於本司自開元以來宰相員少資地  
崇高又以吏兵尚書權位尤美宰臣多兼領之而但從  
容衡軸不自銓綜其選試之任侍郎專之尚書通署而  
已遂為故事或分領其事則列為三銓

四年六月勅其  
員外郎御史並

餘供奉官直進名勅  
授自此不在吏部

尚書掌其一侍郎分其二

尚書所  
掌謂之

尚書銓侍郎所掌其一為  
中銓其一為東銓各有印

初學記曰初漢成帝置列

曹尚書四人其一曰常侍曹後漢初光武改常侍曹為

吏部曹魏時亦為吏部曹專掌選職右於諸曹尚書至

宋置二吏部尚書尋復省一人

沈約宋書曰初晉世散騎常侍選望與侍中不

異其後職任材散用人益輕宋孝武欲重其選待吏部尚書任重遂分吏部置三人以輕其任蔡興宗謂人曰選曹重要重常侍閒淡改之名而不以實雖主意以為輕重人心豈有愛自漢及魏授此職

者或云吏部尚書若授諸曹尚書直云尚書

漢魏晉世若授吏部

者即云以某為吏部尚書若授他曹云某為尚書故歷宋齊以後始云某授工部刑部五兵度支等尚書

代職官之書皆別紀吏部尚書不與諸曹同今書倣此

云

並出漢書齊職儀及五代史百官志

增文獻通考曰宋典選之職自

分為四文選二曰審官東院

太平興國六年命郭贊考京朝官課淳化二年置磨

勘京朝官院又以興國中所置差遣院併入號磨勘差遣院亦名考課院淳化四年以考課京朝官院為審官

院而涑水記間云太宗患中書權太重向敏中時為諫官請分中書吏房置審官院刑房置審刑院熙寧間置

審官西院以主武選於是曰流內銓  
實錄淳化四年以改審官院為審官東院馬

歸流內銓命翰林學士蘇易武選二曰審官西院  
涑水簡領其事自後命近臣主之

云王介甫與韓子華合謀沮文潞公且奪其權一日發中旨置審官西院樞密初不知也  
曰三班

院實錄淳化三年詔置三班院以崇儀副使尉進掌之先是供奉官等悉隸宣徽院至是別置三班院以考

殿最自後多  
元豐定制以審官東院為尚書左選流內  
命近臣主之



銓為侍郎左選審官西院為尚書右選三班院為侍郎

右選

唐制文選掌於吏部武選則兵部主之

掌文武官選授勲封考課之

政令文臣寄祿官自朝議大夫職事官自大理正以下  
非中書省勅授者歸尚書左選武臣陞朝官自皇城使  
職事官自金吾衛仗司以下非樞密院宣授者歸尚書  
右選自初仕至州縣幕職官歸侍郎左選自借差監當  
至供奉官軍使歸侍郎右選凡分職為三封爵贈官之  
事則司封主之賜功定省之事則司勲主之官資課最

名謚之事則考功主之凡應注擬升移敘復蔭補及酬  
賞封贈者隨所分隸校勘法例團甲以上尚書省即法  
例可否不決應取裁者亦如之若中散大夫閣門使以  
上則列遷敘之狀上中書省樞密院得盡給告身則通  
書尚書侍郎及所隸郎官尚書左右選凡十五按侍郎  
左右選凡十五按而四選密矣 尚書從二品掌文武  
選之事而奉行其制命凡天下員闕具注諸籍月取其  
應選者揭而書之集官注擬考其闕閱以定可否凡選

授封爵功賞課最之事皆所隸郎官驗實而後判成焉

若有疑不能決則稟議於尚書省即應論奏與郎官同

上殿 續文獻通考曰遼北面有南樞密院掌文銓視

吏部而部族丁賦之政亦與焉南面吏部置官有尚書

侍郎郎中員外郎 金自太宗十二年始法古立官至

天眷元年頒新官制及天德四年始以河南北選人並

赴中京吏部各置局銓注命吏部尚書蕭頤定河南北

官通注格以合注人依年例一就銓注餘求仕人分四

季擬授遂為定制審官院不屬吏部設知院一員從三

品掌奏駁除授失當事

隨朝六品外路五品以上官除授並送本院審之補闕拾遺監

察亦送本院承安四年設大安二年罷之若注擬失當止令御史臺官論列

元史曰元吏

部尚書三員侍郎二員郎中員外郎等掌天下官吏選

授之政令凡職官銓綜之典吏員調補之格封勲爵邑

之制考課殿最之法悉以任之

凡選官之法從七品以下屬吏部正七品以上

屬中書三品以上非有司所與奪由中書取進止自六品至九品為勅授則中書牒署之自一品至五品為宣授則以制命之世祖舊制惟中書省樞密院御史臺宣政院宣徽院得自選其人他司悉從中書選擇凡選

調閩廣川蜀雲南官員每三歲遣使與行省銓注至英宗時遣使往銓浙江江西湖廣四川雲南五省邊郡官選以後五省皆遣官往銓續文獻通考曰明置吏部即古選部也

自唐宋以來皆為尚書省屬官與周官冢宰掌邦治之意固有間矣故明初六部並屬中書省至洪武十三年革中書省罷丞相使政歸六部吏部分四子部曰總部曰司封曰司勳曰考功二十二年改總部為選部二十九年改選部為文選司封為驗封司勳為稽勳考功仍舊吏部尚書之簡命禮數特異其勳勞茂著往往加以

三孤贈以三公而申之以易名之典自罷丞相以後而統百官均四海之責在吏部固甚重也 永樂初建內

閣不過翰林備顧問比後楊士奇等加至三孤領尚書職猶不得專制外事而品敘列尚書蹇義夏原吉等則不以內閣壓六部之意故景泰以前至尚書不復入內閣固定制也自正德後遂以尚書為入閣階梯云 原杜氏通典曰侍郎隋煬帝置說在歷代郎中篇凡六司侍郎皆貳尚書之事吏部初置一員總章元年加一員龍朔二

年改為司列少常伯咸亨元年復舊分掌選部流內六品以下官是為銓衡之任凡初仕進者無不仰屬焉當選集之際勢傾天下列曹之中資位尤重

初隋世高孝基為吏部侍

郎房玄齡杜如晦與選孝基特加賞異後以為知人唐太宗貞觀時馬載裴行儉為吏部侍郎貞觀以來最

為稱職又鄧元挺為此官不稱職甚為時談所鄙常患消渴選人因號為鄧渴坐此遠澧州刺史有能名武

太后重拜為天官侍郎其獎愈甚又以許子孺為之子孺不以藻鑑為意其補悉委令史勾直時曰平配後

崔元瑋為之介然自守絕於請謁為執政者所忌轉文昌左丞選司令史乃設齋自慶武太后聞之復拜為天

官侍郎  
增文獻通考曰侍郎從三品掌文臣未改秩者

凡始命或有殿負皆試而後選若應選格則團甲同郎官引見於便殿稟奏改官右選掌武臣未陞朝者凡所任而試不中等及已入官而未應選者皆勿注正闕若選路分都監將官閣門祗候都總官司承受皆以名上樞密院視朝入閣則執文武班簿對立官制尚書侍郎同治曹事奏事則同班惟吏選分領四選有所論奏則各以選事同所隸郎官上殿南渡初諸曹尚書侍郎惟吏部備官紹興中六曹皆置權尚書以處未應資格之



人建炎又置權侍郎滿二年為真舊制吏部除侍郎二員分典左右選總稱吏部侍郎間命官兼攝惟稱左選侍郎或右選而已紹興三年謝深甫張叔椿始有侍左侍郎侍右侍郎之稱既而徑入除目相承不改續文獻通考曰遼南面吏部尚書下曰侍郎曰郎中曰員外郎其下屬官未詳金吏部侍郎一員正四品元吏部侍郎二員正四品明吏部左右侍郎各一人

吏部尚書二

原魏志曰盧毓為侍中在職二年多所駁易詔曰官人  
秩才聖帝所難必須良佐進可替否侍中毓稟性貞固  
心平體正可謂明試有功不懈於位者也其以毓為吏  
部尚書使毓自選代曰得如卿者乃可毓舉常侍鄭沖  
帝曰文和吾自知之更舉吾所未知者乃舉阮武孫邕  
帝於是用邕 王隱晉書曰山濤為太常遭母喪手植  
松柏詔曰風俗凌遲豈宜鎮以退讓山太常雖在諒陰  
古人亦墨經從戎其以濤為吏部尚書濤用人皆先密

啓然後公奏 又曰鄧攸遷吏部尚書牧馬於家庭妻  
息素食不受一飯於人 沈約宋書曰蔡廓為吏部尚  
書廓因左丞傅隆問傅亮選事若悉以見付不論不然  
不能拜亮以語錄尚書徐羨之曰黃門以下悉以付蔡  
自此以上宜共參同異廓曰我不能為徐干木署紙尾  
遂不拜干木羨之小字也選案黃紙錄尚書與吏部尚  
書連名故廓云紙尾 又曰江湛為吏部尚書家甚貧  
約不營求利餉饋盈門一無所受無兼衣餘食常為上

所召值澣衣稱疾經日衣成後起 又曰顏峻為吏部

尚書留心選舉自強不息任遇既隆奏無不可謝莊代

峻意多不行峻容貌嚴毅莊風姿甚美賓客喧訴常歡

笑荅之時人語曰顏峻嗔而與人官謝莊笑而不與人

官 百官表注曰吏部尚書一人秩六百石掌選舉齋

祠 晉諸公贊曰李光字宣伯為吏部尚書正身率職

不傾不撓故能行其所見遂刊定選例而著於今 世

說曰王濬沖裴叔則二人總角詣鍾士季須臾去後客

問向二童是誰曰裴王客曰何如鍾曰裴楷清通王戎  
簡要後二十年此賢當為吏部尚書冀爾時天下無復  
滯才 語林曰袁真為監軍范立平作吏部尚書大坐  
語袁卿此段還不失護軍袁曰卿何事人中作市井

增唐書曰裴遵慶代宗時遷吏部尚書朝廷優其老聽  
就第注官時以為榮 舊唐書曰天寶十年楊國忠兼  
吏部尚書故事吏部三銓三注三唱自春及夏才終其  
事國忠使胥吏於私第暗定官員集百僚於尚書省對

注唱一日令畢以誇神速資格差謬無復倫序明年大  
選因就第唱補其所昵者更為立碑尚書省以頌銓綜  
之能 宋楊誠齋集曰葉顥權吏部尚書乾道九年召  
對便殿賜坐賜茶禮異他日帝曰吏部條例朕亦置一  
通在禁中又問卿當官以何者為先對曰以公忠為先  
帝曰卿宜無忘此二字 宋史曰元豐新官制李清臣  
拜吏部尚書清臣初官右正言當易承議階帝曰安有  
尚書而猶承議者乃授朝奉大夫 又曰神宗朝蘇頌

判尚書吏部兼詳定官制唐制吏部主文選兵部主武  
選神宗謂三代兩漢本無文武之別議者不知所處頌  
言唐制吏部有三銓之法分品秩而掌選事今欲文武  
一歸吏部則宜分右左曹掌之於是吏部始有四選法  
四朝志曰元豐選法以薦者多寡為差元祐初孫永  
為吏部尚書恐長奔競之風請改法不用薦之多寡而  
以到選先後為次言行錄曰蘇頌前後掌天官四選  
凡五年每選人改官關陞磨勘吏洗垢求瑕故為稽滯

公勅吏曰某官緣某事當會某處仍引用合用條例及具委無漏落狀同上自是吏不得逞 又曰余天錫以舊恩遷吏部尚書禮部侍郎曹幽在諫省嘗抗疏言天錫登用太驟幽左遷天錫疏謂幽老成之望直諒多益寘之近班可以正厥辟可以儀有位欲望委曲流行使之釋然無疑安於就職則陛下既招好賢之美而微臣亦免妨賢之媿帝從之 元史曰仁宗時由進士入官者僅百之一由吏部致顯要者常十之九泰定帝欲以



中書參議傅巖起為吏部尚書御史韓鏞上言吏部掌

天下銓衡巖起於法亦不得制可其奏獻徵錄曰吏

部尚書蹇義初名瑤太祖時為中書舍人一日奏事畢

問汝蹇叔之後乎親書義字賜之以易舊名太宗時為

吏部尚書有除官不得善地訴其不公者上皆斥之仁

宗時進少師賜銀章曰繩愆糾繆立朝蓋五十年又

曰王翱為吏部尚書翱嚴考察公銓注抑奔競杜請寄

一時任使並稱得人上進退大臣時時召翱面可否稱

為先生翺公退宿朝房惟朔望歸謁家祠天順嘗諭大學士李賢曰今六部尚書皆得人但吏部王翺老耳時翺年七十八賢對曰臣聞祿命之說翺壽最高尚有十年上喜又曰如戶部年富不易得賢曰若繼翺吏部非富不可上曰然 又曰憲宗朝李裕拜冢宰先是銓曹事多脫誤至是拜裕實出宸斷裕感上知遇精白思報每大選先二日於後堂設一木榻上書皇天鑒之與二侍郎傍坐文選司官前立以缺員與選人一一第資格

可否注牘至期引奏填榜更無舛錯而庶官得人一日  
太監覃昌語裕曰先時選官奏入上必命司禮監看詳  
然後報可近日上曰李尚書梗直人必不敢干之奏入  
即與批行 又曰孝宗即位即家召王恕拜吏部尚書  
言官謂恕且老而賢不當勞以繁劇宜用之內閣備顧  
問上報曰朕用蹇義王直故事官恕吏部謀議無所不  
聽從何必內閣也恕在吏部訪海內之士隨器薦用以  
弼成弘治之治 又曰馬文升遷冢宰明年當大計天

下吏孝宗召至煖閣諭之曰天下覲吏畢集卿其用心  
採訪以彰黜陟文升頓首曰陛下圖治若此宗社福也  
敢不仰承乃令中貴人掖之下階自是汰不職者二千  
餘人 又曰嘉靖間太宰缺廷推兵部尚書唐龍上方  
重兵事顧銓衡非龍不可乃改吏部龍為政兼論資望  
殊勞異能疎遠必用而中才不得越次以進有所用舍  
聚僚共謀衆議合然後署疏以請嘗舉廢棄四十餘人  
皆時譽也 又曰世宗嘗問孝宗舊臣而賢者誰乎廷

推周用召以吏部尚書是時郎中為政專尚書不暇有  
所可否而侍郎遞相踵以噤不語為知體郎中盡以任  
吏於是銓部之政幾由吏書用知其弊有所舉措必謀  
兩侍郎咸樂為之盡力而郎中亦以簿書任其僚吏不  
得為奸私故用之典銓不嚴而肅 又曰朱希周為吏  
部尚書當考察嫉者言於上謂南科不罷一人以為私  
希周言察僚庶所以別賢否非論曹局之有無也使一  
曹皆賢必去一人以為公則一曹皆不肖亦且姑去一

二以塞責乎

以上尚書

唐書曰開元中裴光庭為吏部侍

郎初吏部求人<sub>不以資考為限</sub>所獎拔惟其才往往得俊又任之士亦自奮其後士人猥衆專務趨競銓品枉撓光庭懲之乃為循資格無賢不肖一據資考配擬又促選限盡正月任門下省主事閻麟之專主過官凡麟之裁定光庭輒然可時語曰麟之口光庭手遵平轍者嘉其尋常負材用者受其抑屈宋璟固爭不得其庸愚沈滯者皆喜謂之聖書又曰裴行儉善知人為吏部

侍郎李敬元盛稱王勃楊炯盧照隣駱賓王之才引示  
行儉行儉曰士之致遠先器識後文藝如勃等雖有才  
而浮躁銜露豈享爵祿者乎 又曰裴行儉馬載為吏  
部侍郎同時典選十餘年甚有能名時人稱為裴馬又  
盧從愿為吏部侍郎與李朝隱同時典選時人曰吏部  
前有裴馬後有盧李 又曰蘇晉為吏部侍郎裴光庭  
為尚書有過官被却者就籍以朱點頭而已晉因榜選  
院曰門下點頭者更擬光庭以為侮已出為汝州刺史

按集覽過官者凡選事侍郎以下三注三唱仍過門下  
省審之為過官 又曰韋陟為吏部侍郎嘗病選人冒  
名接脚竊授闕員既少取士良難正調者被擠偽集者  
冒進陟剛毅嫉惡風采嚴正見選人疑其有瑕按聲盤  
詰無不首伏每歲皆賸得數百員闕以待淹滯常謂所  
親曰使陟知銓衡一二年則無人可選矣 又曰德宗  
貞元趙宗儒為考功員外郎黜陟詳當無所回憚考入  
中上者纔五十人帝聞善之進考功郎中旋罷家居後



遷吏部侍郎召見勞曰知卿杜門六年故有此拜 又

曰孔溫業大中時為吏部侍郎求外遷宰相白敏中顧  
同列曰吾等可少警孔侍郎不樂居朝矣 唐新語曰

姜晦為吏部侍郎舊制吏曹舍宇悉布棘以防令吏與  
選人交通及晦領選事盡除之示無所禁私引致者晦  
輒知之召問莫不首伏初朝廷以晦改革前規以為不  
可竟銓綜得所賄賂不行舉朝歎服 山堂肆考曰韋  
夏卿為吏部侍郎從弟執誼在翰林受人金有所干請

密以金納夏卿懷中夏卿不受曰吾與汝賴先人遺德致位及此顧當如是乎執誼大慚 宋史曰淳化時蘇易簡知審官院言初任京朝官未嘗厯州縣不得擬知州通判詔可 又曰太平興國五年置京朝官差遣院凡將命出入受代歸闕官悉考校勞績銓量才品命郭贄滕中正雷德驤領之 又曰真宗時雷恕以吏部侍郎知貢舉自以洪人避嫌凡江南貢士悉被黜退又援貢舉非其人之條故所取甚少以王曾為首及廷試糊

名考校曾復得甲科時議稱之恕自歎曰吾得曾名世才也不媿於知人矣 又曰元祐中范百祿為吏部侍

郎

鎮子也

議者欲汰胥吏呂大防趣廢其半百祿曰不可

廢半則失職者衆不若以漸消之自今缺吏勿補不數歲減斯過半矣 又曰仁宗朝杜衍判吏部流內銓選補科格繁長主判不能悉閱吏多受賕出縮為姦衍既視事即勅吏函銓法問曰盡乎曰盡矣力閱視具得本末曲折明日令諸吏毋得升堂各坐曹廳行文書銓事

悉自予奪由是吏不能為姦利後進吏部侍郎樞密使  
每內降恩率寢格不行積詔旨至十數輒納帝前諫官  
歐陽修入對帝曰外人知杜衍封還內降邪凡有求於  
朕每以衍不可告之而止者多於所封還也 又曰吏  
部侍郎彭龜年論韓侂胄將為國患不報於是龜年侂  
胄俱請辭知樞密院事陳騏曰以閣門去經筵何以示  
天下龜年竟外補侂胄曰彭侍郎不貪好官固也元樞  
亦欲為好人邪 樓攻媿集曰孫逢吉為吏部侍郎朱

熹之去逢吉力救之彭龜年補外又言不應為近習而  
逐正人一日會食部中或報王喜除閣門祗候逢吉曰  
此乃優伶嘗於內庭效朱侍講容止以儒為戲者豈可  
以汚清選當抗疏力爭否則於經筵論之由是飛語上  
聞內批為郡 獻徵錄曰吏部闕侍郎以應補者請世  
宗不應而欲求老成名持法者乃以南兵部侍郎歐陽  
鐸上輒報可鐸佐吏部不攜家曰吾乃敢家此官哉

續文獻通考曰吏部左侍郎孫宏聞喪英宗召李賢曰

吏部侍郎乃天下人物權衡非他部可比必得其人誰可者賢曰無如禮部二人可擇而用之上復問其優劣賢曰鄒幹為人端謹但規模稍狹姚夔表裏俱稱有大臣之量上曰然遂用之士皆稱悅

以上侍郎

吏部尚書三

原銓衡

品藻

何法盛晉中興書曰吳隱之字處默少有孝行與太常韓康伯鄰居隱之母亡

每哭康伯母輒涕泣悲不自勝既而語康伯曰汝後若居銓衡之職當用此人及康伯為吏部尚書因進用之

遂歷清望下  
詳後祇慎注

題才

著箴

裴顗辭吏部尚書表曰臣少無鑒察之譽長無

題與之才 李重集曰重為選曹尚書  
著選曹歲置之左右以明審才之官

庭牧馬

閣

聚書

上詳前二 沈約宋書曰少帝即位蔡廓為吏部尚書不肯拜乃以王惠代馬被召即拜未嘗接客

人有與書求官者輒聚於閣下

考簿世

調門戶

初陳羣為吏部尚書

書制九格登用皆由於中正考之簿世然後授任王隱晉書曰王戎為左僕射領吏部尚書自戎居選未嘗

進一寒素退一虛名理一冤枉殺一疽嫉隨其沈浮門調戶選好營生廣收八方園田水碓周徧天下聚斂積

實不知紀極

清通簡要

祇慎廉平

上詳前二 李重選曹尚書歲序曰重忝

曹郎銓管九流品藻清濁雖祇慎莫知所寄虞預晉書曰盧欽字子若少好學為尚書僕射領吏部清慎選舉

稱為廉平

凌虛篤素

抑末崇本

晉起居注云武帝太始八年詔曰議郎山濤志

欽定四庫全書

卷七十六

惟簡靜凌虛篤素立身行已足以勵俗其

薛綜固讓

阮孚不拜

字遙集轉吏部尚書領東海王師辭不拜

詔就家用之尚書令郝鑒以為非體帝曰就家用之誠不快不爾便廢才為當輕重務推之耳

掌六

典統百官

周禮乃立天官而掌邦治以佐王均邦國

書冢宰掌邦治統百官均四海注天官卿也統理百官

銓管

衡鏡

銓管人才衡鏡亦

鏡曰藻

持衡

掄材

采葑

刈楚

魏擇公方任先

毛玠

晉推簡要選在王戎

增冠六卿

亞冢司

集白

蕭俛吏部尚書制冠六卿統百職任昉為范雲讓吏部尚書表臣去歲國學之老博士耳今將亞冢司



李肅題目

山公啓事

南史李肅字偉恭善論臧否得中甄奇錄異薦拔後進題目品

藻曲有條貫以此人服之擢為選部尚書號為得才  
晉書山濤為吏部尚書前後選舉周徧再居選職十有

餘年每一官缺輒啓擬數人濤所奏  
甄拔人物各為題目時稱山公啓事

班序常尊衣

冠傾屬

初學記授吏部者即云吏部尚書若諸曹直云  
尚書蓋此官歷代班序常尊不與諸曹同也自

魏至梁并第三等梁定十八班班多者為貴吏部尚  
書班十四諸曹尚書班十三下見通典注王泰

甄奇錄異

先德後才

上見李肅題目  
下見通典注牛宏

門閥不遺

餽餉無受

上見通典注辛術南史江湛為吏部尚  
書家甚貧不營私財餽餉盈門一無所受

六燕一鴻

邱山沔水

晉陸佃謝吏部尚書啓六燕  
相停試權衡其輕重一鴻遼

遠欲審別其飛翔按九章算術五雀六燕飛集於衡衡適平一雀一燕而異處則雀重而燕輕又張融曰鴻飛天首遼遠難明楚人以為鳬越人以為鴻分紀唐李尚書人王尚書邱崔賓客汚掌吏部皆獲當時推美人為之語曰李下無蹊徑又曰邱山岌岌連天峻汚水澄澄徹底清願選敦重好抑

文雅

陳孔奐為吏部尚書太子叔寶欲以江總為太子詹事奐曰江總有潘陸之才而無園綺之實太子

乃自言於陳主將許之奐乃啓願選敦重之才以居輔導唐戴胄檢校吏部尚書好抑文雅獎薦法吏時以

寡學為訾

顏真謝笑

閻口裴手

上見二沈約宋書下見二唐書

作

九班制

試三銓法

晉劉頌字子雅為吏部尚書作九班之制以別尊卑為裴頠所駁

唐開元十三年吏部為十銓選舉至宣宗即位赦書曰吏部三銓選士祇憑資考多匪實才許觀察使刺史有

奇才異能之士開薦試用三銓謂尚書銓及侍郎二人分為中銓東銓也

毛玠易俗巨

源趨時

魏志崔琰典銓衡十年文武羣才多所明拔天下稱平毛玠與之並典選舉用皆清正之士由

是天下士莫不以廉節自勵時有長吏還者羸面垢衣常乘柴車魏武嘗歎曰孤之法不如毛尚書使吏部用心如玠風俗之易不難唐書韋巨源為吏部尚書時要官缺執政欲以次用其親戚巨源秉筆當除十人皆宰相近屬楊再思曰吾等誠負天下巨源曰時當爾耳

一字拔人三為此職

晉書蔡克居選官苟進之徒望風畏憚初克未仕時山簡嘗與王衍書曰蔡子尼今之正人行以書示衆曰山子以一字拔人然未易可稱後衍聞克居選官曰山子之言驗於今矣下見通典注

裁四選

格法

編七司條例

宋周平園集晏敦復權吏部尚書中興以來凡四選格法多公所裁

定由是士無沉滯之歎秦檜當國使所親招之敦復曰  
吾薑桂之性到老愈辣卒不屈楊誠齋集葉正簡公  
顯權吏部尚書時七司弊事未去公乃與郎官編刻七  
司條例為一書或事同例異者存其一削其一帝覽之  
御筆褒美令  
刻板頒下  
備儀注禮  
作者課法  
隋書牛宏拜吏  
部尚書獻皇后

崩王公已下不能定其儀注楊素謂宏乃舊學時賢所  
仰今日之事決在於公可乃不拜讓斯須之間儀注悉  
備素歎曰衣冠禮樂盡在此矣非吾所及也魏志盧  
毓為吏部尚書明帝謂曰前此諸葛誕鄧飈等馳名譽  
有四腮八達之謂自今選舉莫取有名者如畫地作餅  
不可啖也盧毓曰名不可以得異人而可以得常士王  
者正以循名按常為職但當有以驗其後今考績之法  
廢而以毀譽為進退故真偽混淆虛實相蒙帝納其言  
詔作考  
課法  
却花練  
辭袖金  
陳書姚察為吏部尚書有  
門生送南布一端花練一

足察曰所衣止是麻布蒲練此物於吾無用此人遜請察厲色驅去南史齊褚彥回為吏部尚書有人求官

袖中將金一餅因求請間出金示之曰無人知者彥回不受曰自應得官無假此物若必見與不得不得相啓此

人大懼收金去每招怨言多革弊政尚書持身清潔重惜

官位至於銓授雖得其人必徘徊久之然後下筆且云此人便已貴矣故當時每招怨言然所用者無不稱職

宋史汪應辰為吏部尚書剛方正直敢言不遜在朝多革弊政中貴人側目孝宗時上皇方甞石池以水銀

浮金鳧魚於中上皇指示曰水銀正乏此買之汪尚書家帝怒曰應辰力言朕建房廊與民爭利乃自販水銀

邪遂出之然水銀實非買應辰家也被召即拜加祿先呵蔡廓為吏

部尚書不拜乃以王惠代之惠被召即拜談者以廓之不拜惠之即拜事雖異而意同王宏自領選將加榮

祿於人者每先呵責然後施行若善相盼接者必無所諧人問其故荅曰王爵既加於人又相撫勞便成與主分功若求者絕官敘之分既無以為惠又不微借顏色即成大怨府問者悅服

### 引致才名

遏絕訛偽

北齊書東魏以高澄為吏部尚書始改崔亮年勞之制銓擢賢能又沙汰尚書郎妙選人

地以充之凡才名之士皆引致門下與之遊宴白集宋璟李義掌選部亦能遏絕訛偽振張紀綱餘詳鄭綱

制

官有定價

士不問賢

北史元暉遷尚書納貨賄授官皆有定價大郡二千

疋中郡一千小郡五百又崔亮後魏時為吏部尚書為停年格不問士之賢愚專以停解日月為斷

帝問何先

上歎有序

上見二楊誠齋集周平園集宋晏敦復為吏部尚書上嘗歎

曰敦復凝重剛方當公介然行綜有序適發清明事無奸滯山濤毛玠無以過之

請置架閣

奏撥堂除

宋史徽宗時吏部四選案籍吏多藏於家以舞文取賄陳執中為尚書請置架閣庫

命官位之是後六曹皆倣其法又理宗時杜範為相時親王近戚多求降恩澤範引前朝杜衍例皆封還乞

撥堂除闕歸之吏部以清中書之務人皆以為不便範奏近三四十一年權臣柄國以公朝爵祿而市私恩取吏

部之闕以歸堂除以近年之弊政為祖宗之成法如以臣言為是上下堅守則謗者息矣未幾赴選者無淹滯

合資格者得美闕衆始服時稱廉平世憚剛嚴隋書韋世康和靜謙恕為吏部

尚書十餘年時稱廉平常有止足之意謂弟子曰祿豈在多防滿則退年不待暮有疾便辭因懇乞骸骨周

平園集宋晏敦復權吏部尚書剛毅為世所憚親戚故舊有以書至視其封題有并及兩字者即却之不納惟

務抑僥倖清流品甄敘人物區別賢否一時銓綜號為平允未退虛名不棄大

德

上見調門戶注

思

山堂肆考唐韋思謙舉進士補應城令歲餘調選

書高季輔曰自居選部今始得此一人豈以小疵而棄大德遂擢授監察御史

恐長奔競

請罷耗費

上見前四朝志中興系年錄吏部尚書張壽因對論甲庫萃工巧以蕩上心酤良醢以

奪官課教坊樂工員數日增俸給賜資耗費不貲皆可罷之上曰卿可謂責難於君矣

却例簿

編日歷

宋史寇準在相位用人不以次同列頗不悅他日又除官因吏持例簿以進準曰宰相所

以進賢退不肖也若用例一吏職耳獻徵錄洪武詹同為吏部尚書乞編日歷藏之金匱傳於後世乃詔同與宋濂為總裁官同為吏部甄別

崔亮停年 光庭

資格

上見士不問賢注下見二唐書

游處不雜

才學俱優

袁昂傳昂



雅有人鑒游處不雜為吏部尚書梁帝謂曰齊明帝用卿為黑頭尚書我用卿為白頭尚書 獻徵錄大學士

楊士奇曰吏部尚書非才學俱優者不足以當之

清公見美 剛直不阿 張梁

續讓吏部尚書表云毛孝先以清公見美 獻徵錄成化間李秉為吏部尚書剛直不阿人多怨望大臣有忌

之者噉事中之遂致仕有祭酒某者作詩送之曰古道自無三黜去直臣又見一番歸

三掌銓

選

五典文衡

唐盧承慶凡三掌銓選授平允議者與之 獻徵錄南京吏部尚書錢溥五典

舉扇一揮

停筆良久

吏部尚書屠浦注選至惡

文衡 地必停筆良久務以土俗稍宜者補之

留意孤寒

勤於咨訪

宋樓攻媿集汪

大猷權吏部尚書或曰今日凡事從窄非曩時比蓋有務為沮抑號能任怨而致顯用者大猷曰方且鄙之忍

效尤乎調官者多孤寒之人於此不為留意使得其平  
尚謂之銓衡邪由是鬱者得伸滯者得達求者得遂人  
人感悅亦未嘗屈法以從之有不可者明以告之退無  
所恨獻微錄明宣宗諭尚書郭璉曰朕以用人之柄  
付卿卿宜為朕擇才昨郡守多缺命廷臣薦舉古人當  
斯任者必勤於咨訪有得即錄故官不乏才呂蒙正夾  
袋虞允文材

風吹黃紙

墨汚素衣

吏部尚書居身為

清正在選部門庭蕭索賓客罕至每出入左右常捧一  
黃紙帽箱風吹紙剝殆盡獻微錄太宰屠襄惠滿部

堂燕居令辦事官捧硯時衣素綾甚澤其人誤傾硯汁  
汚公衣惶懼請罪瀆曰去去汝何為者吾方惡其太白

而易汚也又鄉人有假其子沿途騷動人以聞之意必  
加重譴瀆但呼而戒之曰汝為吾子亦不辱但難為汝

父耳法有明禁自  
今慎無復為此也

止談風月

世界榮華

梁書徐勉  
字修仁遭

吏部尚書勉居選官彝倫有序既閑尺牘兼善辭令雖  
文案填積坐客充滿應對如流手不停筆嘗與門人夜  
集客有虞高求詹事五官勉正色荅云今夜止可談風  
月不宜及公事時人咸服其無私獻徵錄南吏部尚  
書王華其生時母夢其姑抱緋衣玉帶一童子授之曰  
以此畀汝世世榮華無替故公生名華名其兄以榮華  
守仁

### 由竇尚書

### 旁舍農人

宋史許及之寧宗時除  
吏部尚書諂事韓侂胄

無所不至為尚書二年不遷見侂胄流涕序其衰遲之  
狀不覺膝屈侂胄惻然憐之嘗值侂胄生日朝行上壽  
畢集及之後至閤人掩關拒之及之俯俛以入當時有  
由竇尚書屈膝執政之謠獻徵錄洪武間吏部尚書  
吳琳致仕家居上遣人察之使者潛至旁舍見一農人  
孤坐小几起而拔稻秧徐布於田貌甚端謹使者問曰  
此有吳尚書者在家否乎農人斂手  
曰琳是也使還以狀聞上益重之

### 有寇準之風

欽定四庫全書

欽定四庫全書  
卷七十六

高潞公之壽

獻徵錄明祖嘗命工部為吏部尚書翟善營第於泰興善力辭謝上語羣臣曰有官

居鼎鼐無地起樓臺善與寇準同風矣又曰古大臣之最壽者惟宋文彥博成化間南京吏部尚書魏文靖

驥年至九十八比彥博尤高蓋古今罕有云

用人莫先論相 太宰天下

取平

宋史留正為吏部尚書言用人莫先論相獻徵錄嘉靖中熊浹為吏部尚書曰太宰天下所與取

平者吾安敢臆決邪凡陞敘無小大流品日與少宰及司屬共之每選必語所司曰此缺果宜否如否雖十易

之何害尤與拔寒唆惟恐其墮落

銓綜號稱平允 吏部豈報恩讎

上見世憚剛嚴注獻徵錄吏部豈報恩讎之地邪王忠肅翔語以上尚書

小宰 貳卿

宋除傅堯俞制吏部古之天官而侍郎小宰之職又陸佃文昌貳卿位次八座

長名榜

流內銓

唐吏部侍郎裴行儉始設長名榜列銓注期限等法又定州縣升降官資高下以為故事長名

勝自此始也

宋選人屬流內銓小使臣屬三班院元豐官制行以流內銓歸吏部侍郎左選以三班院歸吏

部侍郎右選

廳事東西銓

侍郎左右選

唐太和四年吏部奏當司兩銓

侍郎廳伏以吏部為文昌首曹侍郎為尚書貳職銓廳所宜順序廳事故有等差舊以尚書廳之次為中銓其

次為東銓自乾元中侍郎崔器以當時休咎為虞奏改中銓為西銓久次侍郎居左新除侍郎居右因循例署

議者非之伏請自今以後以久次侍郎居西銓新除侍郎居東銓依奏下見上流內銓注

不省

私書

復還舊職

唐書孔緯字化文為吏部侍郎權要請託書盈几案竟不之省又則天

謂崔元瑋曰聞卿改官令史設齋自慶此欲盛為奸貪耳今還卿舊職復除天官侍郎

能知偽

姓 皆給告身

唐會要天官郎中李知遠權知侍郎有選人姓刁又有王元忠者並被放乃密

與令史相知減其點畫刁改為丁王改為士擬授官後即添成文字知遠一覽便曰今年銓覆萬人總識姓名

安有丁姓士姓者此必刁某王某也省內以為神明五代劉岳唐明宗時為吏部侍郎故事吏部文武官告身皆輸硃膠紙軸錢然後給其品高有錢者則賜之其官卑而貧不能輸錢者往往但得勅牒而無告身岳請給一切給之百官皆

金背鏡

歲寒圖

唐書貞觀時高

善銓敍人物帝賜金背鏡以況其清鑒焉獻徵錄明正統間俞山為吏部侍郎上嘉其清慎作歲寒圖併題

詩賜

一布囊

三珠樹

唐盧懷慎赴東都掌選奉身之具惟一布囊王勔王勣

王勃皆著才名杜易簡稱為三珠樹勣仕宏文館學士兼知天官侍郎始裴行儉典選見勣與蘇道味曰二子

皆銓衡才  
後果驗

進止詳華  
從容贊決

唐溫彥博檢校吏部侍郎欲汰擇士

類寡術不能厭眾訟牒滿庭時譏其煩碎然進止詳華  
人皆拭目觀高祖嘗宴近臣遣秦王諭旨既而顧左右

曰何如溫彥博明葉盛天順間為吏部侍郎自入佐  
部政每議禮用人從容贊決其間僚長敬信司屬欣悅

玉山照人

白衣領職

晉裴楷為吏部侍郎風神高邁容儀俊爽時謂之玉山照

人唐陸元方擢天官侍郎或言其薦人如初  
黨武后怒免官令白衣領職元方薦人如初

時稱

高選

行且相卿

唐李元絃杜還為相以宋璟為吏部尚書蘇晉齊澣為吏部侍郎時以為

高選宋史真宗朝李沆卒畢士安進吏部侍郎參知政事入謝帝曰未也行且相卿

四時注

擬十銓選舉

選舉志唐武德初因隋舊制以十一月起選至春即停至貞觀二年劉林甫為

吏部侍郎奏四時聽選隨到注  
擬人以爲便下見試三銓法

榜事曹門 揭條廡

下詔可勝其事曹門 宋史魯宗道判吏部流內銓宗

道在選調久患銓格煩密及知吏所以  
爲奸狀悉釐正之揭科條廡下人便之

勅令引對

請得通劾

謂宋史雍熙二年雷德驥同知京朝官考課帝

使所患不能周知羣臣履行自今令德驥錄履歷功過  
之狀引對既得漸識羣臣擇才委任且使有官政者樂

於召對負瑕累者恥於顧問可以爲勸懲矣 高宗時  
洪遵爲吏部侍郎異時選人詣曹改秩吏以爲市毫髮

不中節必巧沮閹須賂餉滿欲乃止遵明與約苟於大  
體無害先行後審薦員有定限而舉者周遮重複或同

時一事而巧爲兩牘或當薦五員而輒踰十數或當舉  
職官而詭爲京秩或身係常調而妄稱職司或東西分



曹而交錯撓補或已予復奪而指云  
事故件析枚數請凡如是者得通劾

邊遠須才 江

嶺舉職

於唐書崔郾為兵部侍郎判吏部東銓事文宗勤治道乃召三銓謂之曰依資合得而才劣者

何授對曰與邊遠漫官帝曰如以不肖之才治邊民則疾苦可知也凡朝廷求理遠近皆須得人苟非其才人受其弊矣興元初劉滋為吏部侍郎往洪州知選事時京兆寇盜之後天下蝗旱穀翔貴選人不能赴調乃命滋江南典選以便

賞異房杜

獎用孫張

典上見通注

江嶺之人時稱舉職

王邱遷吏部侍郎典選號平允其獎用如孫逖張鏡微皆一時茂秀

厲色必容

點頭

更擬

者苗晉卿知吏部選事性謙柔選人有訴訟索好官者雖至數千言或聲色甚厲者晉卿必含容之拜

吏部侍郎前後典選五年政既寬胥吏多因緣為奸賄賂大行下見二唐書蘇晉

宏景嚴正

岑義勁廉

韋宏景轉吏部侍郎銓綜平允權邪憚其嚴正不敢干以非道岑義進吏部時崔

湜鄭愔及李元恭分掌選皆以賄聞獨岑義勁廉為時議嘉仰

專委令史諫用優

伶

上見通典注見二樓攻媿集下

慰藉衰病

升擢孤寒

樓攻媿集宋趙

粹中字大雅遷吏部侍郎愛惜名器持心近厚有蜀士數人當改秩而吏以微文沮格累年公立為中改有恩

或問之荅曰一官姑以慰其蹉跎待次尚數年何忍沮

之聞者感歎宋仁宗實錄陳堯咨判流內銓舊制選人皆用奏舉乃得改京寺官而士有孤寒不為人知者

免咨特為陳其人推強直帝謂勇決部侍郎嘗任吏功狀而升擢之

致仕官敘五品陟判之曰青壇展慶曾不立班朱紱承榮無宜拜命人推其強直隋楊恭仁為吏部侍郎楊

玄感作亂恭仁與戰於破陵大敗之軍旋煬帝召入  
內殿謂曰我雖知卿奉法清慎却不知卿勇決如此

**遣決滯務**

**裁定外法**

宋韓文惠公彥粹遷吏部侍郎  
右選公承積弊之後釐正簿書

遣決滯務增損廢置五萬四千一百餘事奏請增置郎  
官一員因取當注之闕令大書而揭之門洪邁選墓

誌晏敦復為吏部侍郎掌右選改左選公久典選事知  
吏部七司法多疎外孜孜究心纖悉參考奏請裁定至

今有司守  
之莫能易

**納金不受**

**非錢不行**

上見前二山堂肆  
考鄭惓為吏部

侍郎掌選賊汚狼藉有選人繫百錢於  
鞋帶惓問之對曰當今之選非錢不行

**季卿襟懷**

**見素藻鑑**

李季卿拜吏部侍郎在銓衡數年性識博達  
襟懷豁如士人多附之杜甫上韋見素詩

持衡留藻鑑聽履上星辰注云見素時為吏  
部侍郎銓衡平允上星辰言其親帝之旁也

**牆高遮**

路 李下無蹊

新唐書溫彥博為吏侍有選人裴略被放乃自貧於彥博稱解嘲詭彥博即令

嘲屏牆略曰高下八九尺東西六七步突兀當廳生幾許遮賢路彥博慚而興官唐本傳李知遠知選吏霸

然敝手人稱李下無蹊又李又進吏侍請謁不行時人語曰李下無蹊徑

何燕泉 木居

士 獻徵錄嘉靖間用張孚敬等言更議大禮吏部侍郎何孟春前後三上疏勸從初議削籍去所居廬陵有

泉以燕去來時消長學者稱燕泉先生又李直為吏部侍郎一十六年留意時彥一時干請奔競之風頓息

大稱得人遇不如意事輒誦古人詩自寬有初權給事中即欲干撓選法者則曰偶然題作木居士便有無窮

求福人御史有言吏部進退官不當者則曰若教鮑老當筵舞更覺郎當舞袖長雖涉諧戲要切當云

郎侍

# 吏部尚書四

原掌人物

漢氏重職曹為是吳晉重吏部為非薛令長曰

曰八座秩同班等其選並清宜同一揆以光廊廟不足偏有所重蓋人才或多或少或選例難精如不得已吏部職掌人物難明謂吳晉為得君何是古而非今

主計官

周禮天官司會之職鄭注云會大計也司

會主天下之大計計官之長若今之尚書

掌計要

禮記王制云司會以歲之成質於天子鄭康成

注云司會冢宰之屬掌計要者也質猶平其計要也

位處三曹

華譚集尚書二曹論云今吏部

非為能刊虛名舉沉朴部盤石而名未齒也故錄已成之人位處三曹署聽採公卿譽而用之者矣

銓

管為任

晉起居注云惠帝元康元年詔曰夫興治成務要在官人銓管之為任不可假人授侍中中書

今光祿大夫王戎領吏部正

銓管人才

又太康四年八月詔曰選

曹銓管人才宜得忠恪無欲抑華崇本者尚書朱整周慎敬讓以道素自居是其人也其以整為吏部尚書

建九品之法

魏略云陳羣字長文延康元年始建九品官人法拜吏部尚書也

吏

部宜重

華譚尚書二曹論云人有精粗事有難易在於朝野者率難精擇此吏部宜重者也

舉

無失才

王隱晉書曰山濤為吏部前後所選周徧百官舉無失才凡所題目皆終如其言惟詔用陸亮

清畢力爭之不

選曹尤劇

李重選部尚書箴曰難以得亮尋以賄敗

請謁互起書牘交橫貨賄若市濁清

先舉性行

魏志

難從亦不可杜惟在善察斷因舉主  
誠字子家遷吏部尚書典選先舉性行而後言才李豐常以問誠誠曰才所以為善也故大才成大善小才成

小善今稱之有才而不能為善是才不中器也豐服其言

多被拔擢

魏略云何晏字平叔遷侍

中尚書主選宿與有舊者多被拔擢

心精體密

吳志薛綜字敬文為選官尚書固讓顧譚心精

體密貫通遠微才昭人物德服衆望誠非愚臣所可越先後遂代綜也

執心平當

晉諸公贊

云劉維字公平遷吏部尚書執心平當不能顧憚

當時內外肅然

王隱晉書云鄧攸遷

吏部尚書當時清淨內外肅然

一時之俊

華譚集尚書二曹論云劉道真才識高妙一代名俊

昔與梁相薛令長往見之問曰薛君在吳何官答曰為吏部尚書問吳待吏部何如餘曹曰並通高選而吏部

特取一時之俊劉曰魏晉以來俱爾

主司

理典

周禮太宰掌理典也

考課之

典

魏志韓暨為吏部立考課之典法也

品藻九流

四科取士

知人

取士 射策之初既無失於正鵠 掄材之際必有

適於輪轅 當垂拱之朝實資共理 奉持衡之職必

在至公

白帖

增文昌六卿

楊億代表

中臺職司

又中臺職司願講求

侍瞻望於清光  
於故實未央朝會

四事擇其良

六典四事身言書判

三類觀

其實

又三類德行才用勞效

選妙秩清

見後白制

懸衡處物

唐臨吏部

尚書冊懸衡處  
物虛心待士

恐妨賞適

北齊楊休之為吏部尚書謂人曰此官實是清華但

煩劇妨  
吾賞適

半面不忘

北齊書楊愔字遵彥拜吏部尚書典選二十餘年取士多以言貌時

以惜之用人如貧士市瓜取其大者其聰記強識半面  
不忘每有所召問呼姓名無誤者有選人魯漫漢自言



猥賤獨不見識惜曰卿前在元子思坊騎禿尾草驢  
經過見我不下以方鉤障面我何不識卿漫漢歎服

搖扇厲聲

元順為吏部尚書時朱暉事高陽王雍欲以  
為廷尉評順不為用雍撫几曰身天子之子

天子之弟天子之叔天子之相元順何人棄身成命順  
搖白羽扇徐謂雍曰高祖遷宅中土創定九流官方清

濁軌儀萬古而朱暉小人身為省吏何合為廷尉清官  
雍曰身為丞相錄尚書如何不得用一人為官順厲聲

曰殿下必如是  
順當依事奏聞

方嚴不侵

宋孝武帝好狎侮羣臣自  
太宰以下不免穢辱又寵

一崑崙奴令以杖擊羣臣惟憚吏部尚書蔡興宗方嚴  
不敢侵媒儀曹郎王耽之曰蔡豫章昔在相府方嚴不

狎武帝宴私之日未嘗相召蔡尚書今日可謂能  
負荷矣注云豫章興宗之父廓曾出為豫章太守

摘

發若神

職官分紀梁范雲為吏部尚書寄任隆重書牘  
盈案賓客滿門應答如流無所壅滯官曹文墨

摘發若神時人莫不服其明瞻

為書示衆

陳以徐陵為吏部尚書陵以梁末以來選授多濫乃

為書示衆曰永定之時聖朝草創白銀難得黃札易營致令員外常侍路上比肩諮議參軍市中無數今衣冠

禮樂日富年華何可猶作舊意非禮望也衆咸服之

不畏彊禦

唐中宗景龍四年以宋璟為吏

部尚書李乂盧從愿為侍郎皆不畏彊禦請謁路絕人服其公

首言朋黨

言行錄王存字正仲

召為吏部尚書時在朝朋黨之論正熾公入對首言人臣朋黨誠不可長然或不察則濫及善人東漢朋黨之

獄是也

諫屏鞠戲

陳俊卿為吏書時上未能屏鞠戲公上疏力諫入對上迎謂曰前日之奏

備見忠諫朕決意用卿矣拜同知兼參政

後多知名

范仲淹判吏部尚書參議朝政前後表薦

四十餘人後多知名者

人材可惜

獻徵錄嘉靖間科道互糾題覆二次俱以尚有奸惡顯著

者責吏部黨護兵部尚書史道時掌都察院過大明門  
遇吏部尚書汪鉉乃立言人材可惜公留得一分是一  
分汪亦以為然及有旨再考汪並  
奏公語替科道作說客坐是奪俸  
用舍天下以為當

孝宗即位起三原王宗貫為吏部尚書以劉紹和楊守  
陳為左右侍郎三人協心為政所用舍天下以為當

### 屹然如泰山喬嶽不可撼

宣德朝南吏部尚書黃宗  
載南雖無銓敘之勞而難

於馭吏宗載正已率物屹  
然如泰山喬嶽不可撼

### 令接海內賓客

王恕為冢  
宰時子承

裕隨任令接海內賓客籍其所長恕依而用之一時號  
稱公明當時既不疑其子而海內亦無他議承裕後官  
至南戶部尚書人稱其濟  
美有范忠宣繼文正之風  
良玉溫潤而栗  
嘉靖初冢  
宰汪鉉與

侍郎霍韜持議每不合數面詆譏張邦奇時為右侍郎  
數婉譬曲解之事幸不廢霍嘗語人曰古人稱良玉溫

潤而栗如  
甬川非邪

剡革宿弊品藻人物

明吏部尚書姚夔

久掌衡

鑑博采公議

明吏部尚書尹旻

辨論官材總統百度

明吏部尚書喬

宇

端方強毅清白儉約

惕厲交勤仰思待旦

明吏部尚

書王翱俱獻微  
錄以上尚書

銓衡之任

通典唐掌選部流內六品以下官是為銓衡之任凡

初仕進者  
無不仰屬

銓綜之司

唐書考功員外郎劉思立子憲為河南尉思立今日亡明日選

人有索憲闕者時馬載為吏部侍郎書曰無行注冬集朝廷咸曰真銓綜流品之司可謂振理風俗也

典選十載

又楊纂除吏部侍郎前後典選十餘載時論稱為允當

典選六年

又唐

席豫為吏部侍郎明皇謂之曰卿前為考功職事平允故有此授豫典選六年有令譽又盧從愿精力於官偽

牒詭功檢擿無所遺  
銓綜六年以平允聞

### 四代居選

分紀房頴叔拜天官侍郎自其高祖至頴

叔四代咸居選部時論榮之

### 行儉知人

裴行儉為吏部侍郎典選有知人之鑒見王勣與蘇

味道謂人曰二子亦當掌銓衡之位  
後勣果為天官侍郎味道至相位

### 甄別士庶

唐本傳陸

彥師為吏侍隋承周制官無清濁彥  
師在職凡所任人頗甄別於庶士

### 華侈

唐書韋陟遷吏部侍

郎選人多偽集與正調相冒陟有風采  
綜號為公平俄襲郇國公陟性華侈每食視庖中所

棄其直猶不減萬錢嘗以五采牋為書記使侍妾主之  
以裁答授意而已皆有楷法陟惟署名自謂所書陟字

若五朶雲

### 不能摘發精明

又貞元中奚陟為吏部侍郎時  
謂與李朝隱略等不能摘發精

明如裴行儉  
盧從愿也

### 相對終日無愠言

又天寶中苗晉卿為  
吏部郎中選人訴索

好官屬言佶色紛於前晉卿  
與相對無愠言久之進侍郎

平判皆誦於口

又韋見素為吏

部侍郎平判  
皆誦於口

熟於典故

李益能撰纂北海行狀纂北海先生密禮當維揚兵革之

後省曹簿書殘毀幾盡公為吏部侍郎熟於典故衣冠  
調集及朝政沿革漫無成案可做公援據該審徐出一  
言以決之吏不得容其私公所建明  
悉著於令自是省曹除授皆有案驗  
不負朝廷唐會

部侍郎鄭杲注韓思復為太常博士元希聲為京兆士  
曹嘗謂人曰今年掌選得韓元二子則吏部不負朝廷

矣

隨事疏理

言行錄洪文安公遵字景嚴為吏部侍郎先是選人諸曹改秩予奪一出吏手

公乃隨事疏  
理吏不得肆

即引見

宋史熙寧初王益柔判流內銓舊制選人當改京官滿十人乃

引見由是士多困滯且過舉者有故輒不  
用益柔請才二人即引見士論翕然稱之

覈職田

宋

制為吏者有職田仁宗朝謝絳判流內銓吏部議官舊  
視職田有無不問多寡以是不均絳為覈其實以多寡  
為差其有名而無實者皆不用人以為便  
百爾明慎題奏周詳

獻徵錄明  
吏部侍郎

林文俊  
以上侍郎

### 吏部尚書五

增歲明宣宗吏部歲周官六卿其長太宰統治百寮以  
熙功載漢設選部官置尚書有佐有屬代襲弗渝致治  
之本實資用賢甄拔簡任爾持衡銓爾惟敬之務公戒  
私善爾勿蔽才爾勿遺必黜儉邪必進忠貞用舍適宜

治由汝興苟或貿貿弗博詢采謀面而用弗究其內玉  
石不分臧否莫明治之弗興亦由汝成德德定位乃稱  
任使小知大受官罔不弛精爾識鑒勵爾正直相予於  
治夙夜無斁 原晉傅玄吏部尚書箴曰明明王軌制  
為九秩君執常道臣有定職各有攸司又用不忒貴無  
常尊賤不恒卑不明厥德國用顛危昔舜舉禹咎繇而  
俊乂在官湯舉阿衡而不仁流屏且表正而象平日夕  
而景側處喉舌者患銓衡之無常不患於不明故曰無



謂隱微廢公任私無好自專違衆取怨是以古之君子  
無親無疎縱心大倫修己以道宏道以身易貴好爵書  
慎官人官不可妄授職不可闇受能者養之致福不能  
者蔽之招咎衡臣司書敢告左右

增制唐常袞授裴遵慶吏部尚書制曰門下尚書萬事  
之本選部五曹之右以掌邦典以掄官材漢魏以來多  
用宿儒高德益重其任也具官裴遵慶周慎禮節敬讓  
素居博學而識前言懿文而敦大體迺者匡弼王室克

和庶政訓導儲宮用宏三善日新之美歲晚彌彰自陶  
融於元和不嬰拂於俗務名臣令望清議攸歸處以銓  
覈用澄流品抑華取實無俾滯才 又授劉晏吏部尚  
書制曰門下獻善宣美職在納言錄言任能必歸冢宰  
若萬事之本舉得其要一時之才選當其實則致理之  
體昭然可見矣簡求碩德俾之典崇具官劉晏時傑國  
楨高才博學超詣精理澹然素懷禮法之綱紀人倫之  
模表嘗處台弼以宏訓範載其清靜濟我艱難自勞於

外又竭心力苟利於國不憚其煩領錢穀轉輸之重資  
國家經費之本務其省約加以躬親大小之政必關於  
慮出入農里止舍鄉亭先訪便安以之均節事積而不  
亂理簡而易從故得井賦田租萬億及秭方舟而下以  
給中都水旱不歉人懷其惠可謂盡瘁事國勤勞王家  
也思有褒進屢申退讓然以官人之任朝選無踰藉其  
參領用鎮風俗所總羣務一以咨之中外兼濟固有餘  
力可吏部尚書餘如故 白居易授鄭絅吏部尚書制

曰勅天官太宰秩序常尊自昔迄今冠諸卿首非位望  
崇盛者不可以處之而朕即位以來凡命故相領者三  
矣迨此而四可不重乎具官鄭綱有丙吉之寬裕子產  
之恭惠合而為用藩輔四朝故事遺愛留於官次國之  
都府半在東周委以保釐人安吏肅重煩者德入領冢  
卿昔魏用崔琰毛玠典吏曹一時之士以廉節自勵國  
朝以宋璟李義掌選部亦能遏絕謁託振張紀綱官無  
古今得人則理吾言及此欲爾繼之 蘇頲授盧藏用

檢校吏部侍郎制曰勅朝請大夫守中書舍人盧藏用  
含和育粹直道正身學貫儒墨詞精比興風塵之外獨  
秀瑤林清白之中常懸冰鏡自四年掌誥九品作程峻  
而不雜重輕咸當簡而能要浮競斯遠刀尺之委銓衡  
已歸特選周才更符僉望 白居易授柳公綽吏部侍  
郎制曰勅京兆尹兼御史大夫柳公綽長吏數易為害  
甚多邇來都畿未免斯弊或苛急而人重困或懦弱而  
姦不息得其中者其公綽乎細大必躬親剛柔不吐茹

甚稱厥職惜而不遷然智者常憂忠者常勞亦非吾以  
平施御臣下之道也尚書六職天官首之辨論官林澄  
汰流品比諸內史選妙秩清詢衆用能無易公綽爾其  
飭躬承命以裴王崔毛為心苟副吾言用稱乃職而今  
而後亦何往而不適哉

原諫齊丘遲侍中吏部尚書何府君誄曰遠量夷雅淹  
姿英茂進德方新循名以舊分鑣先達爭驅俊秀匪直  
羽儀實惟領袖知人斯哲在帝之難僉謂往諧是謂能

官園阿望幣釣嶼投竿金張之貴允茲七侍有美一人  
柔貂三珥服冕乘軒鳴玉飛翠不貪為寶貴而能貧惟  
靜是悅惟寂是珍履信茲從積善方慶如何斯德曾是  
知命彼高者天與人焉咏眇望周行式瞻林壑灑沃紛  
埃擯揚流俗言必玄遠神惟珠玉色恬喜愠心豈榮辱  
原表宋謝莊讓吏部尚書表曰招才琴釣之上取士歌  
牧之中終能克夷景命榮懷萬宇豈容先私首曲近有  
經過且不習冠制趙客興鑒未閑統馭鄭臣有規匪疴

身譏 後魏溫子昇為廣陵王讓除吏部尚書表曰假

勢風雲非由羽翮徒得推遷就列僂俛當官曾無辟雍  
議禮之名詎有銅雀獻賦之敏而政本實繁司會尤切  
抑揚智地用舍時流實當年之準的乃一世之權衡得  
其人則分職之任隆非其才則曠官之失起 梁任昉  
為范雲讓散騎常侍吏部尚書封霄城侯表曰夫銓衡  
重務關諸隆替遠惟則哲在帝猶難漢魏以降達識繼  
軌雅俗所歸惟稱許郭齊季凌遲官方淆亂草創惟始



議存改作恭己南面責成斯在豈宜妄加寵私以乏王  
事附蟬之飾空成寵章求之公私授受交失近世侯者  
功緒參差或足食關中或成軍河內或盛德如卓茂或  
師道如桓榮四姓傳祀已無足紀五侯外戚且非舊章  
而臣之所附惟在恩澤且去歲冬初國學之老博士耳  
今茲首夏將亞冢司雖千秋之一日九遷荀爽之十旬  
遠至方之微臣未為速達 沈約為褚炫讓吏部尚書  
表曰竊惟玄素未辨必謬朱紫之察規矩或昧理喪方

圖之功東西兩漢左雄孤絕於前南北二晉山濤莫嗣

於後良由性藏於貌才隱乎心楚越無以況其迴殊山

川未足方其險阻雖復挫

一作拂

暗為明勉愚

一作免過

生智

亦何以登竒拔異離渭分涇

張纘讓除吏部尚書表

曰漢革民曹魏仍東掾毛孝先以清公見美盧子加

一作

若以貞固任職降及晉代希覩其人樂彥輔雍容自守

當時恨其寡譽山巨源意存賞拔

一作拔竒

不免與世浮沉

鄧攸牧馬家庭何益止競之操卞壺如含瓦石未聞檢

裁之功 王筠為第六叔讓重除吏部尚書表曰臣聞

剗犀截鴈必俟昆吾之鋒逐日追風信資伯樂之駿未有駢駕蹇足而方騁遙塗採藝鉛刀而求其斷割伏惟則哲為體事艱歷代明別攸寄義重前王必使玉石薰蕕區別靡雜涇渭玄黃條流不爽自非伯豪之天下能稱仲子之時人歸德孝先之拔真抑偽巨源之黜惡舉善則未可以銓鏡流品平均衡石 陳江總讓吏部尚書表曰竊以漢置五曹方今六尚魏隆八凱擬古六卿

近喻喉舌遠膺樞斗至如東京西晉裴王仰首伸眉可  
得論列此矣但臣門基世緒晉宋以來內侍帷扈入尸  
衡尺或年甫將立或歲未強仕是以退思弱冠追傷疇  
昔早塵華任見知名輩嘗謂忝竊匪朝伊夕豈期梁室  
多故有志無時平生意氣颯爾零落特由邀奉嘉運千  
載一時惟奮寵靈遂臻於此 又為沈尚書君理讓右  
僕射領吏部表曰辛香以來安石以後遵其軌躅必大  
厦之棟梁總其寄任亦巨川之舟楫未有縣力薄材輕

膺此舉 增唐李嶠為李景謏讓天官尚書表曰臣忝  
司衡鏡亟易星灰雖智力已窮而清通未効朱紫多紊  
涇渭莫辨宜其抵罪觸網稍清官謗翻乃假寵增服更  
垂天獎是用荷恩內訟以榮為憂且夫八座位隆五曹  
望重典南宮之喉舌象北斗之樞機或資藻鑑奚綜賓  
實自非孝先亮直彥輔公忠山濤之簡靜篤素顧譚之  
心精體密何以對揚天哲壓塞人望顧斯政本實總國  
彝豈臣庸愚所堪尸忝 宋樓鑰謝除權吏部尚書表

曰竊以選部持衡夙號六卿之長文昌聽履實為八座之聯非素推公方不足以杞吏奸非妙有德望不足以壓餘論雖黃散之下無參異同而縉紳之流鮮不關係宜求精敏之彥以當要劇之司伏念臣才不逮人學徒泥古一為支郡三入修門久侍上皇媿愚衷之無補親逢嗣聖荷褒擢之有加代言非陸贄之工批勅謝李藩之器俯徇芻蕘之論屢寬斧鉞之誅去省眼者五年遂躡登於冢宰離班心者一載遽首列於從臣禁林兼內

制之文史館涉信書之筆滿盈已甚控避莫回頒御府  
之襲衣益之鞶帶駕天閑之良馬覆以雕鞍但喜悅親  
之私敢云稽古之效臣敢不深思僥冒勉竭疲庸為山  
公啟事之書知非所及守崔亮停年之格何足言勞尚  
幾典選之平少助官人之道 周必大謝吏部侍郎表  
曰嚴近叨居夙負瘵官之責武文迭試更膺換部之榮  
襲衣頒在笥之珍寶帶錫章身之寵仰慚主眷俯媿與  
言臣聞古之銓綜存乎人今之銓綜一於法存乎人固

可以得士然其弊也嘗由予奪之不公一於法固可以  
減私然其弊也或致賢愚之同滯而況簿書紛若胥吏  
雜然苟稽察之弗精將混淆而莫辨欲酌古今之中制  
當令人法之並行庶稍戢於吏姦亦少伸於士氣豈容  
虛受以累明揚伏念臣性鄙習迂志卑才下早親翰墨  
為書生陳腐之談久侍軒墀乏禁從論思之語引去則  
寸私之未報欲留則高位之難安方進退之靡寧忽選  
除之下逮肺腑抱履水之懼面顏形撻市之羞被此光



靈若為稱塞伏遇陛下乾行不息日照無私知人非堯  
帝之難巧士奚患選衆有臯陶之舉枉直自分夫何一  
介之臣乃冠貳卿之列臣敢不遵承法令振拔滯淹雖  
微水鑑之明上俾睿哲恪守權衡之信仰助公平苟不  
辱知斯為報國

御定淵鑑類函卷七十六